

بادامی و رن

ص
عابدی





اثر: عاصم اردبیلی



انتشارات آذرکهن

تهران - م. سپاه ، خ. سپاه ، خ. زیبا ، پلاک ۳۲ تلفن ۷۵۳۹۵۴۷

کتابین آدی : یارالی دورنا

قوشان : عاصم اردبیلی (صالح عاصم کفّاش)

متن حرفلرینی دوزن : علیرضا اکرمی

جلد طرحی : استاد حسن مردانه

چاپ نوبه سی : اول

نشر ایلی : ۱۳۷۷

چاپ سایبی : ۳۰۰۰ جلد

چاپ : دلارنگ

لیتوگرافی : مات گرافیک

شابک : ۹-۶-۹۱۸۶۰-۹۶۴

I.S.B.N 964-91860-6-9

کتایین ایچینده کی لر

.....

- ۱..... اوْن سوز
- ۹..... مرتضی سیزلیق
- ۱۱..... حافظ انجمنینه اتحاف
- ۱۳..... ایتگین نگار
- ۱۵..... شکایت یئله نیلر
- ۱۷..... حضرت ولی عصر
- ۱۹..... دنیا مذمتینده
- ۲۱..... گرم محتاجی یام
- ۲۳..... بیدار اولماز
- ۲۵..... یارالی
- ۲۷..... قاچدی جاوانلیق
- ۲۸..... گئجه لر
- ۳۰..... حسرت

۳۳		آشنايم من
۳۵		اوخ سندن بدن سندن
۳۷		داغ كيمي سن
۳۹		گوزلريم توخدور
۴۱		قان آغلاير اشعاريميز
۴۳		نئىلىيە بىللم (۱)
۴۵		نئىلىيە بىللم (۲)
۴۷		اۆلمەدیم قالديم
۴۹		يارالى دورنا
۵۲		آرزى ساجين هورنميرم
۵۵		معلم
۵۸		طياره لر
۶۲		بۆلگى لر
۶۴		داغلار
۶۶		وطن
۷۰		دنيا
۷۲		تضادلار

۷۴	آنا.....
۷۶	مندن نه قالار.....
۸۱	سانجی چکیر یئر کوره‌سی.....
۸۹	حیاتیمین بیر گنجه گوندوزو.....
۱۰۱	گونش یولو.....
۱۰۶	ساوالان قانا باتدی.....
۱۰۸	اردبیل.....
۱۱۱	توی گنجه سی.....
۱۱۳	نمونه مدرسه.....
۱۱۹	سهمیه تویوغي.....
۱۲۶	نیله مگ ایش بئله گلمیش.....
۱۳۰	جبرانی معجزه‌سی مدرسه‌لرده.....
۱۳۳	آتانین دیلی‌جه.....

عومرونون بهار چاغی
خزان ووران بالامین
گوزل ، گویچک بالاسی
اوره گیمین پاراسی
گوزل-ریمین قاراسی
آیدا قیزیماتقدیم



عاصم اردبیلی

مهربان آلاھین آدیلا

اۇن سوز

~~~~~

حق درگاهینه بیر کیچیک بنده کیمی بو ایکینجی شعر  
مجموعه سی نین یاییلماغینا الدهه ائتدیگیم نائلیتّه خاطر  
منتدار لیغیمی قید ائده رک، اوره کدن جوشان دردلی  
سۆزلریمی حورمتلی اوخوجولارین محضرینه تقدیم  
اؤدیرم.

"قانلی سحر" کتابیمدا قید ائتدیگیم کیمین ینه ده  
محضرینیزه دئمه لی یم:

منده او مادی امکان اولماییب و اولمایاجاق که اوره ک  
سۆزلریمی کتاب فورماسیندا اؤز وطنداشلاریماتحاد  
اؤدم نییه کی آینادان آیدیندیر که بیزیم تای توشلاریمیز،  
اؤز حیاتی نین سامان تاپماغینا چالیشاندا، من و سائر

قلمداشلاریم ادبیات اوجاغیندا آلیش میشیق، قیزیل  
گوموشه بئل باغلامدان، زر تئللی گونشین اتگیندن  
آسلانمیشیق. بونولان بئله کی قادر و متعال آلاه  
حکمتیلن انسانین اوزونه بیر قاپونی باغلاسا، رحمتیلن  
باشقا بیر قاپونی اونون اوزونه آچار من شاعرین اوزونه ده  
صداقتلی دوستلار و دردی قانان قارداشلاریمین کرامتلی  
قاپوسون آچاراق کتاب نشر ائدنده اونلارین منت سیز  
یاردیملاریندان فیدالانماق امکائینی توره دیب دیر.

نجه کی بو کتاب دا عزیز قارداشیم رفیع عاصم کفّاش "ین  
مادی کمکی نین اثرینده شرفلی اوخوجولاریمین الینه  
چاتیب دیر. بو سبب دن قان تریلن الدهه ائتدیگی امکائاتی  
منت سیز وجهیلن اختیاریمده قویان دردی قانان قارداشا  
اوز منتدارلغیمی بیلدیریب اونون اوزونه، محترم  
عائله سینه جان ساغلیغی، فیدالی اوزون عومور و عزتلی  
یاشاییش متعال آلاهدان دیله بیرهم.

حورمتلی اوخوجولاریم: سیزین قانلی سحر عنوانلی  
کتابیما اندازه دن آرتیق علاقه گوستردیگینیز، بو کتابین

ایکینجی دؤنه نشر اولماسینا سبب اولدو. بو استقبال  
 منی اوز ائلیمین اوغروندا دهیرلی قدم لر گوتورمه یه  
 آرتیق راق ماراغلان دیردی بو کتاب چوخ بوندان قاباخ  
 الینیزه چاتاییلردی، آما بیر یاندیریجی فاجعه  
 شاعرلیگیمی اوزون مدت لر یادیمدان چیخارداراق بو  
 کتابین یوبانماغینا باعث اولدو. فیکر ائدیرم بو فاجعه دن  
 سیز عزیزلریمه قیسسایا صورتده سؤز آچماق چوخدا  
 یئرسیز ده ییل دیر دوغرو داندایا بو فاجعه ده داغلی لیغین  
 دادینی داددیم، هجر آتشین تاسیندیم، شمع تک  
 یاندیم، اریدیم کوله دوندوم، دردین دولو معناسینی  
 دوشوندوم،

آتش هجره یانان کیمسه بیلر نار نه دیر  
 غنچه گول آچماسا بیلمز ستم خار نه دیر  
 اؤزومو درده گرفتار بیلردیم ولی یوخ  
 ایندی آز چوخ قانیرام درده گرفتار نه دیر  
 مجمر عشقده داغلانماسا عاشق اوره گی  
 حشره دک بیلیمیر عشق اهلینه معیار نه دیر

خزان یثلی اورتانجیل گولومو پرپر ائتدی باخدیم  
 اوره گیمی یاخدیم، قان آغلادیم دوستلاریمی داغلادیم،  
 سئوینجین قاپوسونو سون نفسه دک اوزومه باغلادیم.  
 منہ بیر داغ دادین اسفند آیی دادیردی فلک  
 تا بیلیم سینہ زینب ده کی آمار نہ دیر.  
 فلک مین لر قارقیش دئدیم، باتمان باتمان غصہ یئدیم،  
 جہنم اہلی تک گاہی کول اولدوم گاہ دیرچلدیم، سوزلر  
 بوغازیمدا داشا دؤندو، گوزومون قارشینی دومان بورودو،  
 حرمانلار پنجه سی بوغازیمی سیخدی، بوغولدوم،  
 یثنی دن دوغولدوم.

غرق اولان حالینی ساحلده کی حاشا دوشونہ  
 یانسا پروانہ بیلر، نور نہ دیر، نار نہ دیر  
 گوزہ گورکملی دییر قارلی داغین منظرہ سی  
 درک ائدن سوز زمستانی بیلر قار نہ دیر  
 ایگیرمی سکگیز ایللیک آمگیم بادا گئتدی، گوزوم باخا  
 باخا اوره گیمی تور پاغا باسدیر دیلار، ختم توتدولار، یاری  
 یاردان، سیمی تاردان، گوزی قاشدان، آنانی بالادان،

قارداشی قارداشداڭان آيىردىلار، اوچ يارىم ياشلى "آيدا"  
 بالام قىنىندا سولدى، آرزۇ ساچىن ھورنمەدى، حىيات  
 جىڭلىندە آتاسىز قالدى، گىجەمىن عومرى اوزاندى،  
 حىيات يولداشىم ھمىشەلىك قاراگىنىدى

نەقدىر گوندوزوم آيىرىدى قارائلىق گىجەدن  
 بىلمىدىم بوقدر طول شب تار نەدىر  
 آرزى گولوم ساورولدى، ختم توتدولار، پىر عبدالملك  
 مسجدىندە حورمتلى وطنداشلارىم آغلار گوزىلن منە  
 باش ساغلىغى وئردىلر، ائلىمى دوشوندوم، قىمتىمى  
 بىلدىم، آنلادىم كى بو آغىر جماعتى منىم مادى  
 امكاناتىم، دادلى دوزلى احساناتىم مسجده  
 چكەمە يىبدىر، اوزومو تانىدىم، دۇرد كلمە اورەك سۇزوم  
 چوخلارىن قىزىل گوموشوندىن باش گلدى، شاعر  
 دوستلارىم دورەمى آلدىلار، حضرت سىيدالشهدانىن  
 گوزل عندلىبلىرى سس سسە وئردىلر، حاج سلیم  
 مؤذن زادە، حاج شاپور امانى، حاج باقر تمدنى، حاج  
 شەروز بىوك آقازادە، محمد آقا مصدق، حاج آقا

عبدالحسین، جناب ذوالفقار نژادی و سائرہ مبارک نفس  
 مذاحلاز مجلسین عظمتینہ داها آرتیر دیلار، ائلیمین  
 شانلی شاعری و جلیل القدر عالمی حاج آقا سعادت و  
 بزرگوار عالم جناب آقای سید حافظ موسوی اؤز عالمانہ  
 موعظہ لر یلن نفسلری اوره کلمده حبس ائله دیلر، ائلیمین  
 قدر دانی ایدیم داها دا قدر دان اولدوم، اوره گیمین اودونا  
 سوسپیلدی، شاعر دوستلاریم، مغانلی سرمد، مراغه‌لی  
 پاشازاده، آذراوغلی، ائلچی معلم، شاهد معلم اوغلو  
 داریوشون یاسیندا یاندیریجی شعرلر یاز دیلار شاهی  
 معلم قوللارین بوینوما دولاییب، بالامین بویونو  
 اوخشادی، ائلیمیزین گوزهل مرثیه شاعرلری، جناب  
 هادی و جناب غفاری آغلایا آغلایا ائویمه گلدیلر و آغلایا  
 آغلایا گئتدیلر، دارالارشاد انجمنی جمله اعضاسیلا  
 راسینده قدر تلی مرثیه شاعری جناب محمد تقائی،  
 آل محمد (ص) انجمنی، حافظ انجمنی و استانین شعر و  
 ادب انجمنی بوتون اعضاسیلان بو آغیر مصیبتده یاددان  
 چیخمایان عاطفه‌لر بنده یه گوستردیلر، علیرضا بیگناه

دوستوم تفلیس شهریندن تلفن دالیندا آغلایا آغلایا منه  
 باش ساغلیغی وئردی، حورمتلی دوستلاریم مسعود  
 ساجدی، خلیل نعمتی، سعید مهاجری، ناصر دیبا،  
 نوروزی، پوراکبر، روحی، اکبر صمدی جنابلاری حدیندن  
 آرتیق اوز محبتلرینی داغلی دوستلارینا ابراز ائتدیلر،  
 تهراندا هیأت زهرا(س) و هیأت حضرت ابوالفضلین  
 محترم عضولری حاج آقا سعادت نیا حورمتلی شاعر و  
 آقای وکیلی نین همتیلن بو مصیبتیه دایر ختم دوتاراق  
 منی اوز محبتلرینه بورجلی ائتدیلر. مختلف تلگرافلار،  
 مکتوبلار مختلف شهرلردن الیمه چاتدی. تأسف ائدیرم  
 که فاجعه نین آغیرلیقی منی هر تک تک دوستلاریمدان  
 شرمنده ائله دی. مکتوبلارینا جواب وئره نمه دیم یقینیم  
 وار اوز بیوک لوکلرین گزشت ائدی، منی  
 باغیشلا یا جاقلار.

معلم دوستلاریم قدملریندن مضایقه ائله مه دن، باشیمی  
 اوجالتدیلار، غیر انتفاعی سما مدرسه سی بوتون  
 اعضاسیلا باش ساغلیغی وئرمه گه ائویمه گلیب، عاطفه

گوستردیلر، ادبلی، وفالی دردی قانان محصللریم دیلیلن،  
قلم یلن، قدمیلن اؤز محبتلرینی داغلی معلم لرینه  
بللندیر دیلر.

قیسسا سوزبوکی، تمام آد آپاردیغیم دوستلار،  
قلمداشلار، همکارلار، معلم لر، محصللر، وطنداشلار و  
سیرداشلار منی اوز محبتلریله اوقدر اوتان دیر دیلار کی  
اؤزومده او لیاقتی گورمورم کی میندن بیر محبتلرینه  
جواب وئرم. مهربان آلاهدان هر تک تکینه، هدفلی  
عومور، شرفلی یاشاماق، جان ساغلیغی دیله بیرم. ها بئله  
آرتیرمالی یام کی کتاب ایچینده بعضی لره اتحاف  
ائتدیگیم شعرلر دوستلار آراسیندا آیری سئچگین لیک  
نیتی ساییلماز، تکجه دییه بیللم بو دوستلار منیم یامان  
گونومده اوقدر جاندا، باشندان چیخدیلار کی بو نوعیلن  
ایسته دیم اونلارین سونسوز محبتلرینه جواب وئیریم. بو  
نئچه دقیقه آینادان آیدین اوره گینیزه کدر توزی قونسادا  
امینم کی گذشت ائده جک سینیز. ساغ اولون،  
شادیاشایین.

عاصم اردبیلی

مرتضى سيزليق

ପ୍ରାଚୀନ ଓଡ଼ିଆ ଶିଳାଲେଖ

منی جانان سالانماز دهرده بیرگون دواسیزلیق  
سالار مین درده اما جسمیمی درد آشناسیزلیق  
وفا فرهاددن مطلوبدور مین لر جفا گورسه  
که شیرینین پوزانماز شهرتین بیر دم وفاسیزلیق  
طریق عشقه سالک گرکدیر خاکسار اولسون  
مرصع تاجدیر عارف باشیندا ادعاسیزلیق  
نگارین امرینین اجراسینه مین جانفدا ایستیر  
سلیمان حکمونو باطل ائندن دیر جانفداسیزلیق  
نفس تامنله همدمدیر قوپار سس بندن بندمدن  
کی نی دن اوممیور بیر کیمسه دنیاده نواسیزلیق  
مذمت ائتمه کونلوم تکیه گاه ایستر قوجالیدیقا  
اندر خلوت نشین پیر خراباتی عصاسیزلیق

گرفتار اولموشام بیر دامه نئیلیم بینوالیقدان  
 اسیر دانه ائیلر مرغ خوشخوانی نواسیزلیق  
 عطا سندنندی یارب لطف قیل گیرم خطاکارم  
 عطا سیزلیق سنین ذاتیندا یوخ ، منده خطاسیزلیق  
 اوره کلر گوزگوسون کاسلاندیریب ریب و ریا اهلی  
 صداقت کشتی سین طوفانه سالمیش ناخدا سیزلیق  
 عدالت واژه سی اوچموش کتابلاردان گرم گوستر  
 که ائلر چکمه سین آخر زاماندا مرتضی سیزلیق  
 کونول مولکون چراغان ائيله سون عاصم یولون چاشماز  
 بو ظلمت خانه ده حکمون سورور تا رهنماسیزلیق

اردبیل ۱۳۷۳/۹/۸

## حافظ انجمنینہ اتّحاف

[illegible]

شعرین نقدر شعله سی میخانه میزده وار  
یارین اوقدر جلوه سی پیمانه میزده وار  
گوی چلچراغی ، سوسسی ، اولدوز پیچیلتی سی  
صوبحون صفالی آیناسی کاشانه میزده وار  
مینلرجه ورد و ذکر و دعا ده اولان کسر  
بو انجمنده نعره مستانه میزده وار  
بیز رنج مولکونون قوجامان گنجداریک  
سولغون باخیشلارین شله سی شانه میزده وار  
بیز ازدها یاتیر تمامیشیق گنجین اوستونه  
گیرم غزل دفینه سی ویرانه میزده وار  
چون توکمو شوک اوره ک یاغینی عشق اجاقینه  
ققنوسلر حماسه سی پروانه میزده وار

بیز عشق دامنن توتاراق عقلی آتمیشیق  
 مـجنون لر حکایتی افسانه میزده وار  
 بیز مهر بذرینی قارا توپراقدا اکمیشیک  
 صلحون علامتی جوگهرن دانه میزده وار  
 گوزلر سوۆزی ، اوره ک دیله گی ، دیل روایتی  
 زلف نگاری نظمه سالان شانه میزده وار  
 رونقندن آز گـتیرسه ده عاصم بو انجمن  
 روحون غذاسی سفره شاهانه میزده وار  
 جانانه نین بو محفله تاوار عنایتی  
 جان دردیـنه دوا بو دواخانه میزده وار

اردبیل ۱۳۷۴/۱۲/۱۵

قار تئلی گولستان صفالی دوستوم

غفور سلیمانزاده یه اتحاف ائدیرم

### ایتگین نگار

خبر سیزدیر بهارین قاصدی ایتگین نگاریمدن  
نگارین عطرینی آلمیر مشامیم نو بهاریمدن  
اورهک یانماقدادیر هجر آتشینده شعله سیز سس سیز  
کمان اولموش امیدین قَدی سونسوز انتظاریمدن  
چورهک بیر سَدّیر سیندیرماقیندان عاجزم یوخسا  
خیالیم قویمارام بیر لحظه قالسین آیری یاریمدن  
من اول آئینه یم داشلیقدا سینماق حکمونه محکوم  
دایانماق حقّی دانماق فرض اولوپدور سنگساریمدن  
سحرمین رنگلی انسان نمالردن اورهک داغلی  
گنجه مین نیسگیلیم یلدایه بنزر شام تاریمدن

جوانلیقدان قالان نقدینم الده بیر صداقت سه  
 عومور کئچکدیکجه نیلیم ائیلیرم خرج اعتباریمدن  
 زامان جبریلہ الفت قاتمیشام آهسته آهسته  
 دهاگوز یوموشام پیرانه سر اوز اختیاریمدن  
 سحر دن آخشاما مین جور چالیشماق بیرقارین توخلوق  
 بو بیر ارثیه دیر چاتمیش منه ایل و تباریمدن  
 کدر سیز بیر گئجه اومدوم فلکدن اولمادی مقبول  
 نه دیر مقصودی عاصم بیلمه دیم بوتار ماریمدن

اردبیل - بایرام گنجہسی ۱۳۷۵/۱/۱

خوش گونون همدمی ، یامان گونون دایاقی  
 "محمدنورباقری" دوستومه اتحاف اندیرم

### شکایت یئله نئیلر

~~~~~

شنلیک یاغا گویدن بو پریشان دیله نئیلر
 یاز مژده سی قیشدان توره نن نیسگیله نئیلر
 دیوانه نی زنجیر یله رام ائیله مک اولسا
 دیوانه لیلا یه آغیر سلسله نئیلر
 شکر نه قدر ذکر اولاشیرین دهن اولماز
 وصلت سوزی هجران دان آغارمیش تئله نئیلر
 گول ائتدی شکایت ستم باد خزان دان
 بلبل دئدی آهسته شکایت یئله نئیلر
 اغیارین الیندن ائله دیم یاره گلایه
 نازیله دئدی اهل جفایه گیله نئیلر

مهریله دئدیم قَدیم اولوبدور خم الوندن
 قهریله دئدی غصه بوکولموش بئله نئیلر
 هم نازی سئویندیردی منی همدە عتابی
 عاصم هله گور نیسگیلی دیلدن سیله نئیلر

اردبیل ۱۳۷۵/۲/۱۵

ووراردیم طعنه‌لر مننده بیابان‌گرد مجنونه
 دئمه عشق ائيله یرمیش عاشقی بیرگون بیابانلیق
 دیردیم حق چاتار حقداره بیرگون ، آنلادیم سن سیز
 ترازوی عدالت گورمیور دنیاده میزانلیق
 ئوزون گل اوز الونله ظلمتین متیننده اولدوز اک
 قارانلیقدان جانیمیش ائلره گوستردرخشانلیق
 سنیلن گنج‌لر ویرانه‌لردن باش چیخارتمازلار
 سنیلن مار ائده‌نمَز مور ملکونده سلیمانلیق
 سن اولسون حاجی‌لار دشت مناده ذبح ائدر نفسی
 سن اولسون مینلر اسماعیل اولماز نفسه قربانلیق
 سنیلن عاصمین درمان تاپار گیزلین اولان دردی
 سنیلن سلطه تاپماز بیرزaman دانایه نادانلیق

اردبیل ۱۳۷۶/۵/۱۷

دنیا مذمتینده

﴿مَنْ يَتَمَنَّاهُ يَكُنْ لَهُ﴾

جور جانانه دۇزن كيمسه وفاسيندا گورر
 آجى درمانى ايچن شهد شفافسيندا گورر
 اوكى عاجزدى اوره ك دردينى اظهار ائله يه
 بغضى فرياده دۇنن چاغدا دواسيندا گورر
 سالماسا بلبلى ديلدن ستم باد خزان
 بير تالانميش چمنين يازدا صفاسيندا گورر
 اويما اغوا ائله ين ظاهر دنيايه كونول
 آلدانان عشوه لى دنيايه اداسيندا گورر
 هر قدر قدرته امكان توره ديب چرخ دنى
 او قوى شوكتين آخرده فناسيندا گورر
 حشمت وجاهى سليمانه وئرن دور زمان
 دوندريب تختينى تابوته عزاسيندا گورر

باخما گورکملی خط و خالینه هرزه فلکین
 آدانیب کیم او خط و خاله خطاسیندا گورر
 نه وئریب بیزلره دنیا بیره مین آلمالی دیر
 کهنه تاجردی خریدار رباسیندا گورر
 "عاصما" باغلاما بئل بیربئلہ دنیاہ یقین
 کیم ییپدیر بالین البته بلاسیندا گورر
 گنجہ یاری سی تهران یولوندا ۱۳۷۶/۶/۱۴

اٹلیمین شرفلی شاعری دکتر یوسف معماری

قلمداشیما

کرم محتاجی یام

~~~~~~

دۆزر گول هجرینه آواره بلبل خاردن اومماز  
اسیر طره دلدار اولان اغیاردن اومماز  
خیال یاریلن سرمست اولان صهبایه یالوارماز  
خمار چشم ساقی خانه خماردن اومماز  
کونول دؤزدور اومان یئردن کوسر اما منیم کونلوم  
بلادن باشقا بیر بذر و عنایت یاردن اومماز  
حیاتین یوللارین پای پیاده طی ائدن سالک  
اومار داغ داشدان اما نانجیب رهواردن اومماز  
اورهک تا داغ کیمین طوفان ئونونده تکیه گاه ایستر  
اودور جمعیّت خاطر سینیق دیواردن اومماز

شرف بیر دَر دور دگمز گوزه ویتترین زرگرده  
 بو دَره ال تاپان کسب شرف دیناردن اومماز  
 کَرَم محتاجی یام نئیلیم کرامت قحط سالینده  
 منیم بو قان اولان کونلوم کَرَم کفتاردن اومماز  
 نجابت گوهرین دامان عفت عیب سیز ساخلار  
 بو گنجین حفظینه مأمور مخلص ماردن اومماز  
 توسل چنگینی دامان خاشاکه وورار عاصم  
 نولر، اما ترخم گرگ یوسف خواردن اومماز

اردبیل ۱۳۷۳/۵/۱۲

## بیدار اولماز

~~~~~

لب لعلوندن اۆپن شهده خريدار اولماز
 سير رويون ائله ين مایل گلزار اولماز
 توکمه سون طره افشانيني زيبا اوزونه
 بو پريشانووه دنيا ده شب تار اولماز
 سن کيمين نازيله جان آماقا بير مشتري يوخ
 من کيمين دهر ده اول نازه خريدار اولماز
 دانه خالينه وابسته دير از بس اوره گيم
 هيچ صياد بوجور صيده گرفتار اولماز
 حسن باغيندا چاتانماز سنه بير لاله عذار
 گوزلرون تک گوزليم نرگس بيمار اولماز
 تا خيالن منيلن وار اوياغام شام و سحر
 تکجه بختيمدي که بيلم نيه بیدار اولماز

سریمه واقف اولان بیر سن ایدون بیرده صبا
 نه بیلیم باد صبا محرم اسرار اولماز
 عشقین اثباتینه یانماق قدم اولدیر
 او دو پروانه کیمین شیفته نار اولماز
 طوطی طبعیمی عشقوندی شکر خای ائله یین
 یوخسا عاصم بوقدر شهره بازار اولماز

اردبیل ۱۳۷۳/۷/۲۰

صداقت اولگوسی وحید حسین آقائی محضرینه که

دنیا لار قدر عاطفه سینه بوشلییام

یارالی

~~~~~

خزانہ توش دی کونلوم بهاردن یارالی  
 قیشا یاخینلا شیرام روزگاردن یارالی  
 سحر تحمّل اشراردن اوره کده غمیم  
 گئجه م تحمّل بو شام تاردن یارالی  
 فراق شعله مه دامن وورور سیزیلدیر اوره ک  
 وصالدن یارالی غمگساردن یارالی  
 زمان چاپیر ائله سرعتله چاتمیرام توزونا  
 داليجا گوز تیکیرم اعتباردن یارالی  
 حضور جمعه فکیریم گزیر داغی دره نی  
 ایتیرمیشم مارالی ، مور و ماردن یارالی

داهاترانه لریمدنده غم نواسی گلیر  
 ربابدن یارالی، چنگ و تاردن یارالی  
 بیر عمر بذر محبت اکیب تیکان بیچیرم  
 گولی تیکان بئجره ن شوره زاردن یارالی  
 فلک یخلمیشی یام عمر ذیروه سین آشیرام  
 بونا برابر اولان کار زاردن یارالی  
 اوره ک غمیله یانار ساخلیرام امید چراغین  
 زمانه دن یارالی انتظاردن یارالی  
 وفا جزاسی جفادور اوتوزما عاصم اوزون  
 قمار عشقده اولسوندا یاردن یارالی

یارالی دورنا، ۱۳۷۴/۵/۱ اردبیل





کیمه عمروم بویی جان جان دئمیشم هرسؤزونه  
 دئدیگیم هر جانا مین یول دئدی قان قان گئجه لر  
 اوقدر ساخلا می شام غصه لرین حورمتینی  
 غمدی دائم یئتیشیر بزمیمه مهمان گئجه لر  
 تکجه شعریمدی منی باغلایان آیدین سحره  
 یوخسا یوردومدی منه قورخولی زندان گئجه لر  
 دوزهرم ظلمته چننگیمده امیدین اتگی  
 قویمارام سالسین ایاخدان منی هجران گئجه لر  
 ای منیم روحیمی ایلر بویو تسخیر ائله یین  
 یوخ خیالین کیمی جان دردینه درمان گئجه لر  
 تاپمادی "عاصمی" شیرین یوخو عمرونده بیرآن  
 نئجه یومسون گوزونو دردلی انسان گئجه لر

اردبیل ۱۳۷۶/۹/۱۲

شمالی آذربایجانداکی وطنداشلارا اتحاف

## حسرت


~~~~~

حسرت گونشین آیناسینی تار ائده بیلمز
 نور وور غونونا ظلمتی دیوار ائده بیلمز
 هر اولکه ده همت الی قوزانسا سمایه
 سئل گوجلوا اولار ، قطره سئلی خوار ائده بیلمز
 بیگانه چالان لای لایا گوز اولدی که مایل
 محشر توپی دا اول گوزی بیدار ائده بیلمز
 حسرت نه چی دیر ساخلیا عشق اهلین هدفدن
 ذلت تـوـزی آذر ائلینی زار ائده بیلمز
 حسرت توخومون وارسا اکن دهرده قارداش
 بو شانلی ائلی درده گرفتار ائده بیلمز

دیل دلبره خاطر یارانیب یوخ سؤزوم امّا
 هر تاجر اونو خانه دلدار ائده بیلمز
 ایمانيله گوج گلمگ اولار توپ و تفنگه
 ایمانسیزی زر صاحب ایثار ائده بیلمز
 حق عاشقی حاشا ائله یه میل مجازه
 جان قورخوسی عشق اهلینی بیعار ائده بیلمز
 اسلام علمین همت الی قالدیرار عرشه
 داشدان یونولان ثابتی سیار ائده بیلمز
 ایمان توره دور غیرت اون اوچ یاشلی جاواندا
 یوخسا یالین آل تانکیلا پیکار ائده بیلمز
 گر حکم اولا ساتقینلیقا من یاره ساتیللام
 آیدیندی که اغیار ائده نی یار ائده بیلمز
 یار آلسامنی ساتماز اوجوز قیمته قول تک
 بو کهنه نی مین تازه دل آزار ائده بیلمز
 قارتال ائله قارتال یاشایار قالسادا دارددا
 اصلانی زامان سیخسادا کفتار ائده بیلمز

آذر ائللینن نسبتی وار شیر خدایه
 آجلیق بو ائلی راغب مردار ائده بیلمز
 ایمان گوجو تکنیک گوجونو سیندیرار "عاصم"
 ایمان ائدهنی درهم و دنیار ائده بیلمز
 - باکی ۱۳۷۶/۱۱/۱۸

آشنایم من



وفا سیز آشنالردن اوره کده مین ملالیم وار
 ائله سرگشته یم ساقی نه شوریم وار نه حالیم وار
 محبت رشته سین اول یار سنگین دیل قیریب مندن
 یتیر پیمانه نی، پیمانی سیندیرماق خیالیم وار
 دیل دیوانه تک عقلیمده چاشسا عیبی یوخ چاشسین
 نه جاهیم وار پوزا دیوانه لیک نه ملک و مالیم وار
 دوداقیمدن سکوتین مَهر و نو سیندیر ایاغیلن
 که کنج سینه ده محبوس اولان مین قیل و قالیم وار
 منه بیگانه لر تک باخما ساقی آشنایم من
 خرابات وفاده باشقا بیر شأن و جلالیم وار
 شورانلیقدا بیتن بیر لاله یم اومما صفا مندن
 که وارلیق دفتрінده تکجه بیر پوزقون مثالیم وار

حیاته باغلی بیر ائل وورغونو کان وفایم من
 کمال فقرده سینمده استغنا مدالیم وار
 قالانمیش کونلومه هجران غمی داغلارکیمین "عاصم"
 ایاحدان سالسادا باشدا گینه شوق وصالیم وار
 وفادان اوزمه رم ال باشیمه تیر جفا یاغسا
 وفاسیز روزگار یله گنجه گوندوز جدالیم وار

نوشته یازمیشدیم: اردبیل ۱۳۶۵/۱۰/۱۸

عزیز قلمداشیم آذراو غلونین ائل اوغروندا

چیرپینان اوره گینه

اوخ سندن بدن مندن

~~~~~

ترحم ائتمه ای صیاد اوخ سندن بدن مندن  
 پریشان روزگارم بیر نفر یوخ یاد ائدن مندن  
 منه بیگانه لردن حشره جک بیر آشنا چیخماز  
 آماندیر مهرینی ای ماه تابان کسمه سن مندن  
 سولان گلزاریمی حاشا وئرم مین باغ رضوانه  
 باریشماز منله کونلوم بیر زامان کوسسه وطن مندن  
 یانار اوددان خلیل عشقی قورخو تماوتان زاهد  
 من اود اولادی یام یانسام بیتر دشت و دمن مندن  
 کولومدن گولله نر گلشن گولر کؤشن آچار سوسن  
 قاریشسام تورپاغا عطرین آلا رمشک ختن مندن

طریق عشقده عشاقه باش سربار دیر "عاصم"  
 وطن اوغروندا باشندان کنچمه سم اینجیر بدن مندن

اردبیل ۱۳۶۸/۱۰/۴

خزر احتشاملى قلمداشيم ائلچى معلمه اتحاف

## داغ كيمي سن

~~~~~

سن اودلار اولكه سینه گول چيچكلى باغ كيمي سن
 شلاله نغمه لى وولقان نفسلى داغ كيمي سن
 گونش ضيالى ، گولستان صفالى ، قار تئلى
 قرانليقین اوره گين يانديران چراغ كيمي سن
 آراز جوشملى ، خزر احتشاملى ، سئل گوجلۇ
 بو تشنه كونلومه تسكين وئرهن بولاغ كيمي سن
 كتاب كتاب او گئنيش سینهن ايچره سئوگى ياتيب
 عداوتين گوزونه سانجیلان پيچاق كيمي سن
 آنا ديلينده سؤنن قان بوياخلی كلمه لری
 اوره ك ائوينده الوندیران اجاق كيمي سن

آدين ائل ائلچى سى اؤز محتشم دياريندان
يئتيش مئييب سنه پاي بؤلگى ده قوناق كيمى سن
سالاندا عاصمى وحشتلى دالغالار ديلدن
اومود كؤزون منه جانلانديران مایاق كيمى سن
گونش گونش دئييريك سنلى منلى بيرگنجه ده
بو فرقىلن سارى زوغ مثلى من بوداق كيمى سن

۱۳۶۹/۲/۱ اردبیل

يامان گونون دوستى نادر خوئى زاده دوستوما
اتحاف ائديرم

گوزلريم توخدور

~~~~~

گوزلريم از بس كه قورخوب تهمت تكفيردن  
پند زاهد تك دوشو پدور سوزلريم تائيردن  
مجرم، جورموم صداقت، سئوگى، ائل وور غونلوقى  
كافرم چون يوخ نقاييم حيله و تزويردن  
عاصي يم ذكر يم سندندير شدت عصيانيمه  
خاطي يم كسگين دى چون شعريم ايتى شمشيردن  
خوشدى كونلوم درديلن محنت اوسانديرماز منى  
اوللم اما توشسه گر بيرآن قلم تحريردن  
وارليقين باشدان داشين آتماق شرفندندير كونول  
اورداكيم باج ايستتير روبه صفتلر شيردن

تکجه تقصیریم منیم باشیمده ائل سئوداسی دیر  
 حشر اولونجاق چکمه رم ال بیر بئله تقصیردن  
 بـندبندیم باغلانیب ائل زلفینه زنجیر تک  
 منده عشقین لذتین تامسینمیشام زنجیردن  
 من خزان شهرینده یازدان آیری یامسا هر زمان  
 گولله نیر مین بیر چیچک ذهینمده کی تصویردن  
 اللی ایل دیر چیرپنیر سینمده قلبیم اللی گون  
 قالمایب وورغون کونول دونیاده ایمن تیردن  
 گوزلریم توخدور چیخاردانماز طمع یولدان منی  
 وحشته آجلیق دالار "عاصم" منیم تک سیردن

۱۳۶۹/۵/۲۲

مولا علی نین خالص عاشقی سیّد علی عابدیان  
(شاهد) قلمداشیما بیر ناقابل هدیه

## قان آغلا بیر اشعاریمیز

~~~~~

بی وفالیق رسـمینه تا باغلی دیر دلداریمیز
دم به دم قالخیر سمایه آه محنت باریمیز
بیر بئله همت ، صداقت ، سئوگی ، وورغونلوق ، شرف
حلّ مشکل ائيله مز تا الده یوخ دیناریمیز
گنج سیز گیرم صداقت ملکونون قارونیک
بی بهادیر رنجدن حاصل دُر شهواریمیز
یار الیندن یاره گورموشلردنیک یئرسیز دگیل
آغلا سین وورغون کونول ، گولسون بیزه اغیاریمیز
گوز سئویر هرکیمسه نی اما اوره ک طرد ائيله بیر
رنگلر ترکیبی آرتدیقجا ایـتیب معیاریمیز

چون اوره ک قانیله سیراب ائیلیریک سوز گلشنین
 چوخدا علت سیز دگیل قان آغلایر اشعاریمیز
 زهر هجريله ائله سرشاردیر جان ساغری
 طوطی لر شهرینده شکر دن کوسوب منقاریمیز
 دهر بازارینده تا اصلین یئرین توتموش بَدَل
 مشتری دن خالی اولموش "عاصما" بازاریمیز
 ای قلم اوزمه الین دامن مولادن بیر آن
 چوخدا ویراندیر اوره ک آنجاق اودور معماریمیز

اردبیل ۱۳۶۹/۷/۱

نئیلییه بیلم (۱)

بو سینه ده گوهرن اضطرابه نئیلییه بیلم
 زمانه تحفه سی حدسیز عذابه نئیلییه بیلم
 بیر عمر آرزینن آردیجا قاچمیشام گئجه گوندوز
 توتانمیرام اتگیندن سرابه نئیلییه بیلم
 عقاییدیم منی گویدن یثره زمانه وورودور
 سینیق قانادلا بو سای سیز غرابه نئیلییه بیلم
 سازاق وجودیمه شاللاق وورور سیزیلدیر عصبیر
 کونول سازیندا قوپان اعتصابه نئیلییه بیلم
 خمار باخیشلارا مین بیر غزل اوره کده وار اما
 زامان کوزیله کول اولموش کتابه نئیلییه بیلم
 گونشلی نغمه لریم سینه م ایچره بنده دوشوبدور
 بو تنگناده آچیلماز حجابه نئیلییه بیلم

اورەك سۆزون اوتوز اوچ حرفە دىل سىغىشدىر ابايلىمىر
 بو جوشلاتىپ جالانان التەھابە نئىلىيە بىللم
 گونش گونش دىەرەك دوز گىلن قارانلىقا "عاصم"
 دومان لىچكى دۇنان آفتابە نئىلىيە بىللم

اردىل ۱۳۶۹/۱۰/۱۱

فَيَلْبِسُهُ يَلْبِسُ (٢)

ڪونول زمانه ڪيمين ظلمڪاره نئيلىه بيللم
 بيزى فنايه چڪن روزگار نئيلىه بيللم
 اوره ڪ غميم منيلن اللى ايل اولار بويا چاتميش
 بويور گوره ڪ بئله بير همقطاره نئيلىه بيللم
 اولن ديلكلره سينه مزارى مسڪن اولوپدور
 بو سد معبره بو احتكاره نئيلىه بيللم
 اوزوم گولور ، اوره گيم آغلاير گوزوم سؤزه گلميش
 سوسان ديليمله بو اوچ بيقراره نئيلىه بيللم
 شيرينليگين ايزين اوزموش زمانه زهرى سؤزومدن
 جوشوب داشيب جالانان زهرماره نئيلىه بيللم
 صداقتين چورييب ساققيزى توشوپدى اغيزدان
 ڪاساد بازاردا او بى اعتباره نئيلىه بيللم

شرافتین باشی شرّ اهلینین قالب گرووندا
 بو آفتیله سولان گلعداره نئیلییه بیللم
 عدالتین بدنی لوت قالب سازاخدا، بوراندا
 سویوق نفسله او دونموش شکاره نئیلییه بیللم
 زمانه رسمی دیر اوزلوک سوز اوز دهاگوزه دیمیر
 زمانه رسمینه بو استتاره نئیلییه بیللم
 اوره ک سئون یولو قهریله سدا ئدیب ستم اهلی
 بو جبریلن تالانان اختیاره نئیلییه بیللم
 سینیق اوره کلره درمان قیلاندا داردادیر "عاصم"
 او شیر کیمین باغیران غمگساره نئیلییه بیللم

اردبیل ۱۳۷۰/۱/۲۶

اۆلمەدیم قالدیم

كونول هجر آتشیندن گلدی جانە اۆلمەدیم قالدیم
وصالی ائیلەدیم الدە بهانە اۆلمەدیم قالدیم
خزان تاراج ائدەندە گولستانی من اوزوم گوردوم
دئدیم بیرگون دۇنر یاز گولستانە اۆلمەدیم قالدیم
تالاندىقجا یاشیل باغلار قالاندى سینەمە داغلار
سارالدىم اوخشادیم برگ خزانە اۆلمەدیم قالدیم
آجیخلار سینەلردە سئوگی نین ، عشقین یئرىن توتدی
محبتدە دۇنوب اولدو فسانە اۆلمەدیم قالدیم
چورەك تا قفل اولوب آسلاندى دوز گونلوک دوداقیندن
اجازە تاپمادیم شرح و بیانە اۆلمەدیم قالدیم
چالیشدیقجا آلیشیدیم شعلەمە دوران اتک ووردی
تحمّل ائیلەدیم سوز نەانە اۆلمەدیم قالدیم

خرامان كېكەر قوزقون بساطينده گۈزه دگدى
 ھمالر قالدی حسرت استخوانه اۆلمەدیم قالدیم
 جەنم اھلى تەك گاهى كول اولدوم گاه دیرچلدیم
 اود ایچره تاپدیم عمر جاودانه اۆلمەدیم قالدیم
 زمانه قویمادی پیمانەم "عاصم" زھرسیز قالسین
 باش اگدیم نیلەمک بو امتحانە اۆلمەدیم قالدیم
 اردبیل یلداگئجه سی ۱۳۷۰/۹/۳۰

استاد حسن مردانه محضرينه كه بير دنيا

محبت لرينه بوشليام

يارالى دورنا

سیندیردی سکوئی گولله نین سسی

قالدی قاطاریندان آرالی دورنا

اووچو تفنگینی سالدی چینینه

یئرده قاناد سردی یارالی دورنا

قالدی قاطاریندان آرالی دورنا

سوروندو اوزونو بیر یانا چکسین

اووچونون الیندن قاچماق ایسته دی

قانلی قانادینا حسرتله باخیب

تکجه اون آدیملیق اوچماق ایسته دی

اووچونون الیندن قاچماق ایسته دی

قاناد اۆز بورجونو چاتدیردی سونا
 ایندی سه قوش جیغاز نئيله دی گۆره ک
 قاباخدا اوچوروم دالیندا اووچو
 بیرینین ذاتی داش بیرى داش اوره ک
 ایندی سه قوش جیغاز نئيله دی گۆره گ

اوچورومدان اوزونو توللادی چایا
 اووچونون اوشوتمه سالدی جانینا
 شرفلی اؤلومو خوشلادی دورنا
 حورمت باغیشلادی آخان قانینا
 اووچونون اوشوتمه سالدی جانینا

نازیلان گلمیشدی گئتدی یازیلان
 قالدی قاطاریندان آرالی دورنا
 هاردان گلمه گینی کیمسه بیلمه دی
 سئله قسمت اولدو یارالی دورنا
 قالدی قاطاریندان آرالی دورنا

آنجا ق او دورنادا گلین ساراتک
 چاغلایب آغلایان سئلره چاتدی

بیر سس سیزاؤلومدن قوپان های هاری
 یئلرین الی له ائلره چاتدی
 چاغلاب اغلایان سئلره چاتدی

اردبیل ۱۳۶۸/۹/۱

عند الوین جورکین ایلرین
 کومول کورن سئلره
 قارالار کورن اغلایان اغلایان
 آسما آسما خیالیمدا یارالیم
 کولیم سئلره یارالیم
 یوردا آتیر
 قیچ سئلره یارالیم
 یئلره یارالیم
 لاکه لرین کورن اغلایان
 عسار یارالیم
 قان تر ایلریم یارالیم
 قول یارالیم
 قوچان قوچان

صداقت بولاغی ، شرافت داغی استاد حسن رستمزاده
دوستوما بیر ناقابل تحفه

آرزی ساچین هورنمورم

~~~~~

آستا، آستا  
خیالیمدا یاراتدیغیم  
گول چیچکلی باغچالاری  
بوران آلیر، قار بوره یور  
قات قات قونور اوره گیمین  
آن شافاخلی گوزگوسونه  
کدر توزو .  
غم بایقوشی کوکسومده کی سئوگی قوشون  
ووروب قانلی قیناغینا دیلدن سالیر

دالغا دالغا، دومان منی  
چولغالا ییر داغلار کیمین  
من سائر شان اولدوزلاری

درین درین سمالرده گۆر نمورم

یاشاسامدا، ساغلار کیمین

کیلکه لنمیش آرزی ساچین

داها اومود بارماغیلان هور نمورم

یاز باغریندا، دولو وورموش

باغلار کیمین.

یونگول، یونگول کلمه لرله

عداوتین چیرکین ایزین

کونول لردن سیلنمیرم

قارالاراگون آغلایان آغلار کیمین

آستا، آستا، خیالیمدا یاراتدیغیم

گول چیچکلی باغچالاری

بوران آلیر.

شح مونجوقی بوز باغلا بیر

بنفشه نین گوزلرینده

لاله لرین آل یاناغین

ساری لیغین درد یوزور

قان تر ایچره بئجرتدیگیم

قول بوداخلی قیزیل گوللر

قوجاق قوجاق

شله شله

قالاناراق چوره كچى نين تنديرينه

كوله دونور

شعره داير

گنجه لرین یوخوسوندان سالدیردیغیم زامان اولور

غاز صفینده .

ایندی منیم خیالیمین یوگرک آتی

اووسونلانمیش بیر قالادا

گنجه گوندوز

دگرمانی فیرلانديران آت یئرینه دوران سورور

من سائرشان اولدوزلاری

درین درین سمالرده گورنمورم

گوزلریمین قارشى سینی چن بور یوب

آرزى ساچین داها اومود بارماغیلان هورنمورم

ایندی منیم ، اوزاخلاردان دینله دیگیم های هارای لار

قاطار قاطار دورنالارین حیات وثرن سسی که یوخ

گالن گالن ، کپسول کپسول

تمدنوں انسانلارا تحفه سینین های کویودور

اردبیل ۱۳۷۰/۳/۲۴

معلم

قلم سیلاخیلان جهلین اؤنوندە  
داغ کیمین دایانان ، اصلان تک دوران  
دوشونجه بایراغین چوخ احتشاملا  
اوجا ذیروهلرین باشیندا ووران

آلان بیر الینه علمین مشعلین  
ظلماتین کوکونو یاخیب یانديران  
سحردن آخشاما قان تر ایچینده  
اوشاغا یاخجی لان پیسی قانديران

دونیادان گدینجه معلم قالان  
حوریت مارشینی مکتبده چالان  
طفیل بالالارین آغری سین آلان  
اونلار بوی آتدیقجا اؤزو خیردالان

روحو ماوی گویده گلن پروازا  
بئر اوزره قناعت ائیله ین آزا

بوراندا کلاسی دوندهرن یازا

قارانلی آغاردان سوز یازا یازا

ادب باغچاسیندا اینسان بئجریب

اؤز اورهک قانیلان قوللوغون توتان

بیر دنیز شیرینلیک دیلدن جالاییب

مین دنیز حیاتین آجی سین اوتان

یاز قارا تاختانین آغارد اوزونو

گوستر اوشاقلارا یولون دوزونو

یای شانلی اولکه مه ایستی نفسین

سیندیر جهالتین دمیر قفسین

سن سیز قان آغلایار بوگوؤل حیات

سن سیز قارا گیهر بوتون کاینات

سن سیز بیتن چمن کول اولوب یانار

سن سیز آچان قونچا گوللوگون دانار

سن سیز یاشا دولان بارا دولانماز

سن سیز کئچن عومور حیات اولانماز

ياشاماق شيرين سه باغلى دير سنه  
 سن سن ياشاماقى اورگه دن منه  
 من سنه بوشلى يام دونيالار قدر  
 سنلن بخته وره م سن سيز دربه در  
 سنلن باج آلام گونشدن آيدان  
 نجه دويلا بيلم سن وئره ن پايدان  
 گوروم بنجر تديگين گوللر سولماسين  
 آنجاق بير گونومده سن سيز اولماسين

اردبيل ۱۳۷۰/۲/۱۸

## طیاره لر

~~~~~

بیر تاجردن سوران اولسا

فیکر ائدیر سن دمیر قاناد طیاره لر

نه دن اوتری دوزه لیپلر

من بیله نی دئمه لی دیر

طیاره بیر وسیله دیر امکان وئریر

بیوک تاجر سحر چاغی

صوبخانه سین ائوده یئییب

ناهار چاغی اوور وپادا اوز تاییلان

گؤروش ائدیپ

آخشام چاغی اوز ائوینده

باش یاسد یقا قویوب یاتا

نغمه کاردان سوران اولسا

طیاره یه دایر اولان نظیرینی

دئمه‌لی دیر

طیاره دیر قادر اندیر مغنی نی

آز زاماندا چوخ یئر لرده چیخیش اندیب

اولدوز کیمین بوردا چیخیب

اوردا باتا

یازیچی دان ، ژورنالیستدن

وکیل لردن ، وزیر لردن

حکمراندان ، بیگ دان خان دان

و..... و..... و.....

سوران اولسا طیاره لر نه دن اوتری دوزه‌لیپلر

هر بیر سی اوزایشیلن رابطه ده

سوز مرکبین

فصاحتین میدانیندا چاپمالی دیر

آما اگر ایندی کی گون

دزفولداکی قان تر ایچره

قازاندیغی تالاناندان

بالا داغی داغلار قدر

اوره گینه قالاناندان

حلبچه نین چوبانیندان

خر مشهرین قوجاسیندان ، جاوانیندان

اردبیلده داشقاچی دان

میانادا پاخلاچی دان

اری اؤلن دول قادیندان

جبهه لرین سربازیندان ، پاسداریندان

شهیدلرین آتاسیندان ، آناسیندان

آتالارین الدن وئرن بالالاردان

مدرسده ده یولداشینین بوش یئرینه

شکلین قویان محصلدن

بو صحنه یه قان آغلیان معلمدن

بغداد داکی گئجه گوندوز

هر بیر آندا مین یول اولوب دیری لندن

سوران اولسا

طیاره لر نه دن اوتری دوزه لیب لر

هر تک تکی دئمه‌لی دیر

طیاره بیر وسیله دیر

ظالم‌لرین برک ایاقدایا خاسینی

عدالتین پنجه سیندن قورتارماقا

قارینلارین تمدن‌ون اوتلاغیندا اوتارماقا

ظلم الیندن جانا گل‌میش انسانلارین

کوک‌لرینی کول انده رک ایتیرمه‌گه

جنایتین قوجاق قوجاق یثر اوزونده

بذرین اکیب بیتیرمه‌گه

اردبیل ۱۳۶۹/۱۱/۱۴

بۇلگى لر

بۇلگى لر بۇلگى لر بۇلگى لر بۇلگى لر بۇلگى لر بۇلگى لر بۇلگى لر بۇلگى لر بۇلگى لر بۇلگى لر


بىلىم بو بولگونو بولدى ھانكى آل
يارامنه چاتدى يار سنین اولدو
قايغى سین چكديگيم باغچانين باغين
تيكانين من درديم بار سنین اولدو

عۇمرو باشا ووردوم سۆز يازا يازا
چوخلارين قيشيني دوندرديم يازا
ماھنى لار من قوشدوم تاريلان سازا
سازاق منيم اولدو تار سنین اولدو

قارانى آغیلان باریشدیردیلار
هرزادی ضدیلن ياراشدیردیلار
توکوب بیر کیسه یه قاریشدیردیلار
یوخ منه یئتیشدی ، وار سنین اولدو

فاتح گروہونون داغچی لارینا اتحاف

داغلاږ



دره‌لر اوقـدر خاملادیب بیـزی
آلچاق بیر تپه‌ده تیتـره‌دیر دیـزی
پـوزولور داغلاردان داغچـی نین ایـزی
قـالـر کـونلوموزدن آرالی داغلار

بولبوللر كوسوپدور باغچادان باغدان
توسدودور قوزانير سۇنن اوجاقدان
گوزلرده آوارمير قارانى آغدان
آنچاق گۇز اۇنونده قارالى داغلار

آصلانلار ھييتى سىينىر قفسىدە
قولاخلار كار اولور بوغولور سىدە
تولكولر گۈرندە آصلان ھوسىدە
غىصەدن گىت گىت سارالى داغلار

سيز نجه داغلى سيز قاردان بوراندان
 بيزده يورولموشوق چندن دومانان
 مين يارا گورموشوك كوئول اومانان
 اولموشوق اوره كدن يارالى داغلار

رودخان قالاسى ۱۳۷۲/۲/۲۰

حضور حماسه سی مناسبتینه

وطن

~~~~~

ساوالان و قارلی وولقان نفسلی  
دوشمانین قنیمی دوستدا جان وطن  
اىلر نیسگیلیندن ایلر اوزونو  
اوره گى آغیرلی باغری قان وطن

کونلومه دوولن زاماندا آدین  
سنین اولادینام سنین اولادین  
آجی لیک سیلنمز آغزیمدا دادین  
یئدیگیم زهر اولسا بیر زامان وطن

نئجه باغلی اولار بولبول گولشنه  
تئل به تئل باغلایب اوره گیم سنه  
بیر کوز اوجاغیندا پای چاتسا منه  
دونماز داماریمدا آخان قان وطن

عشقین او قدرت کی بذل ائدی بیزه  
چتین لیک داغ اولا چو کمه ریک دیزه  
سینه خور باخانلا گل سوک اوز اوزه  
فکریندن ائله ریک پشیمان وطن

یایاریق عالمه حکم قرانی  
قویماریق ضای اولسون شهیدلر قانی  
وطنی ائیله ریک خائن زندانی  
خادمه اولاروق میزبان وطن

بئش گونلوک شهرتین آتاریق داشین  
آغلایان گوزلرین سیله ریک یاشین  
ساخلاریق آشاغا مفسدین باشین  
مخلصه ائده ریک جان قوربان وطن

منطقه باغلاریق مکتبین تئلین  
حورمتین ساخلاریق محتشم ائلین  
علمیلن سیندیرریق جهالت بئلین  
اولار دورت بیر یانین گلستان وطن

آغ اولاموکل یاداکی قارا  
 حقی محمده وئریک حقدارا  
 ظالمین باشینی تاپشیرریق دارا  
 مظلوما اولاریق سایه بان وطن

جاوانلی قوجالی وئرریک الاله  
 دوشمانین کوکونو باغلاریق سئله  
 بلکه اوز اخلاردان باخیب دینجله  
 حسین فهمیده تک قهرمان وطن

او خالص، او مخلص، او دنیز او داغ  
 او شهید، او شاهد، او گلشن او باغ  
 او دایاق، او اویاق، او چراغ او ساغ  
 سنین سینه ن اوسته وئریب جان وطن


او اوشاق، او بیوک اون اوچ یاشیندا  
 او ایثار داش قاشی اوزوک قاشیندا  
 خوشلادی پیرینی گوزلر یاشیندا  
 اولدو اوره کله ره حکمران وطن

او کئچدی جانیندان بیز گله ک جانا  
ایمان سلاحینی چکه ک میدانا  
ایرانسی ائیله یک عدالتخانا  
قالاسان جهاندا جاودان وطن

محنتلر گون به گون چیخسادا سایدان  
گوزلر دویما یاجاق سن وئرن پایدان  
سنلن باج آلا ریق گونشدن آیدان  
یاشادیر "عاصمی" بو گومان وطن

اردبیل ۱۳۷۴/۷/۳

**دنیا**



اوقىدر قارىشىب وارلىقا زھەر  
يىخلىق گوزوموزده گورسنىر شىكر  
اۇلنە دئىرىك گىتتىدى بىختور  
اولدى پىيس اوزونىدن آزالى دنيا

دوداځلار ګولوشه آچيلمير بير آن  
محبت قوشونو آزديريب بوران  
قوجادان سئچيلمير غيرتلي جاوان  
قونچا تک قينيندا سارالي دنيا

گولشنون قارقانین قفس بولبولون  
داراغین تیکانین، اوراق سونبولون  
گولشنون، بولبولون، سونبولون گولون  
ائلیگن الیندن یارالی دنیا

دره‌نی دیکلتدین اوخشاتدون داغا  
 آلچاقی اوجایا ائیلهدین آغا  
 داشدان اوچی یوندون سالدین اویلاغا  
 اوخلاسین هاردا وار مارالی دنیا

اردبیل ۱۳۷۴/۸/۹

## تضاد لار

~~~~~

اوزامان کی نور جالانمیش بیر سرایدا
 سنین ظریف بارماخلارین
 آستا آستا سونبوللرین قیزیل ساچین
 تومار لایان نسیم کیمین
 ساز تئلینی داراخلاییر
 خاطره لر وارقلا ییر
 همان زامان بیر تالانمیش
 قاراقیشین شاللاغینین سیزیلتی سی اوره گینده
 شریم شریم یاشیل ایزلر کور گینده
 سویوق سونسوز بیر گنجه ده
 کورپه سینه لای لای چالیر

اوزامان کی هر بیر آددیم آتدیقیجا
 قوجاق قوجاق، خرمن خرمن
 قالی لرین گول بوتاسی ایاخلانیر
 همان زامان قارانقلیق بیر داخمادا

جانسیز بیر قیز دار باشیندا
 اولومولن ال به یاخا
 حسرتیلن باخا باخا
 اوره ک قانی بولاخ بولاخ
 گوزلریندن آخا آخا
 فرشین سولماز گلشنینه
 بارماقلارین بوغازیندان
 ایلمه ایلمه قان چيله بیر

تهران یولی ۱۴/۱۲/۱۳۷۴

آغ بیرچک آناما بیر ناقابل تحفه

آنا

~~~~~

هر کیمه محبت سالدیم دنیادا

ایم بوشا چیخجاق اوخشادیم یادا

امگیم ضای اولوب گئندنه بادا

تکجه سن سن منی اتمادین آنا

حرمانلار آلاندا منی آریا

شیرین سوزون اولدی مرحم یاریا

گئجه نین چاتسادا عومری یاریا

بیر یول مندن قابق یاتمادین آنا

منی هاخلایاندا غم لر غصه لر

توتولدون پوزولدون سن مندن بتر

کونلومدن کدری آلدین بیر ته هر

یوکونو چیگنیمه چاتمادین آنا

مین کرهن دردی می دئسمده سنه  
بیر کرهن نیسگیلین آچمادین منه  
گوزوم ساتاشینجاق ساچیندا دنه  
دردینی دردی مه قاتمادین آنا

اوگون کی سگه دن توشدوم پول کیمین  
یئر سیز ملک اولدی یئرلی غول کیمین  
گوردون کی ساتیلیر اوغلون قول کیمین  
سن آلدین بو قولی ساتمادین آنا

او حـزین پیچیلتین اولای لای سسین  
عاصم ده بنجر تدی شعرین نطفه سین  
یادیندان چیخسادا آدین هرکسین  
شاعر سـماسیندا باتمادین آنا

اردبیل ۱۳۷۶/۷/۲۴

اوره گیمین بندى رامین اوغلوما

## مندن نه قالار

~~~~~

منیم ایستکلی بالام آغرین آلیم، سئوله منه. بیرگون اگر،
دست قضا. قیلدی روا. قیردی منیم ریشه می قهریله
کۆکوندن. منی دینجالتدی اوچگینیمده اولان چوخلی
یوکوندن، هئچده ترپنمه دی بیر توک فلکین بوللی
توکوندن، منی سن سیز، سنی من سیز ائله دی، سنه
مندن نه قالار؟

بختیمین اولدوزی، سئوله منه بیرگون آتاوون سوزگون
اولان اولدوزی سوزسه هامی اولدوزلار ایچیندن، ائله بیل
هرزه آلاغ دوغرانو یای فصلی بیچینده، سنه مندن نه قالار

؟

آی بئلیم قوتی، دیز طاقتی، گۆز نوری بالام، بیرگون اگر
یئلکانی سینمیش گمی تک ایتسه دنیزلرده آتون گۆزلر

اٲویندن او اوزاځلاردا یوخ اولسا، اوکی سن فیکر ائدیسن
اولمیا بیردن بیره اولسا، اوکی سن ایسته مه ییب سن
سولا، گر قهریله سولسا، سنه اوندان نه قالار؟
عومرومون میوه سی او غلوم، اٲویمین جلوه سی او غلوم،
بئله سانما من اولندن سورا او غلوم اولوسان صاحب
ثروت، تاپوسان شانیه شوکت، آلیر اطرافینی نوکرله
رعیت چالیسان کوس منیت، کی منم بوردا و بغدادده وار
بیرجه خلیفه.

بونو سن بیلمه لی سن، سون بئشیگیم، اٲوانشیگیم،
سیل گوزونو سال اونا دقتله نظر گورکی اونون چینینه
ایلر بوی غملر قالانیب دیر، او خزان یاپراقی تک باد
ستمین تالانیب دیر، صبرینین کاسه سی داشمیش او
طبیعتله ساواشمیش، یارامازلار تیکانی جسمینه
باتمیش، اوره گی قانه بویانمیش، آما خوشدور اوز
ایاقلارینین اوستونده شهامتله دایانمیش. تا گلیب دیر
اوره گینده کٲچه جکدن اوساغالماز یارالار درمانا گلسین،
گون به گون محنت آزالسین سانا گلسین، پائیزین یاپراقی

رنگينده ياناقلار قاناگلسين،
 قورويان آرخاسو داشسين، يول آچيب باغلاری آشسين،
 باغلانان قاپلاری آچسين، زهره ايواندا باش آچسين،
 گولوشون اويناغی سيلسين کدري غملى اوزوندن، اوزی
 گولسون، سوزی گولسون، اورگينده کوزی گولسون، بیری
 قالسين يوزی گولسون، آیری گندسين دوزی گولسون، کی
 آسيلمیش ياخاميزدان سوری لر محتر انسان، وای
 کاربخديم منی عفو ائيله بالام یر تیجی حیوان، اونا انسان
 دئمک اولسا، داها بیز لر دئمیه ک انسانا، انسان. اونا
 حیوان دئمک اولسا، دئمیه ک اصلانا حیوان، کی اولار
 چوخلو پریشان سنه قربان. احتکارچی بیلوسن نیلوری
 بو ملته اوغلوم؟ یوخسولو هاممی دان آرتیق سالیری
 زحمته اوغلوم، آما آشکاردو مسلمان باشینی دلتته
 اگمز، مال دونیا جمع اولایر پارا حیثیتته دگمز.

او دییر تک من اولوم، اوزگه لریله نه دی کاریم، منیم
 انسانلیقیما اولگودور اوز دارونداریم، پول اولوب یاور و
 یاریم، همی ده سئوملی یاریم، بیرده گول اوزلی نگاریم،

پول منیم قول و قراریم، پول منیم لیل و نهاریم، پول
منیم باغ و بهاریم، پول مهیا ائلیین دیر منه مینلرجه
شکاریم.

محتکر کیمدور اوغول؟ محتکر جنگ زمانینده بیزیم
روزی میزی آنبارا ووردو، بیزه دوشمانلار اگر بیر یارا ووردو،
بو بیزه مین یارا ووردو، قورخوسیندان اوقارانلیقدا
اوزاخدان داشین آتدی، محتکر آله چراغ سؤیدو بیزی
گوز قاشین آتدی، جبهه لرده او گول اوزلو بالالار قانه
باتاندا، باشین آسوده قویوب یاسدیغا یاتدی، شرفین
قیدینی آتدی، نه اوجوز قیمته انسانلیقی ساتدی.

محتکر دیودی که خلقین جانینی شیشه ده ساخلار،
محتکر دردی وئرندن سورا درد اهلینه آغلار، محتکر دن
شرف او مماغدا شرافتدن اوزاخدیر، محتکر ده ادب اولماز
او نزاکتدن اوزاخدیر، محتکر دینی ساتار دین و دیانتدن
اوزاخدیر، محتکر او غرودو بیلیم نیه بس آله چراخدیر.

بس دیر او غلوم سؤز اوزاندی، قلمیم بوردا دایاندی، یاراماز
بیزلره یاتماق اویان او غلوم، گؤرسون ائل اوددا یانیر سنده

يان اوغلوم، آيرى دوشمه اۆز اتليندن، ايگيت اول برك
 دايان اوغلوم، كى معلم آتائين اوغلوسان اوغلوم، سنده
 "عاصم" كيمى اۆز يوردووا چوخ باغلى سان اوغلوم، سنه
 مندن قالان اولسا، ايتى بير ديل قالاجاق بير قلميله كى
 ديليله دوراسان دوشمانا قارشى، قلميله اولاسان ملتووه
 دينووه حامى، چونكى سن بوشلى سان اوغلوم، ده گوروم
 خوشلوسان اوغلوم؟

۴ آذرماه ۱۳۶۴

زلزله حادثه سينين اثرينده جانين، مالين، آتاسين،
 آناسين، باجى سين، قارداشين، سيرداشين، يولداشين
 الدن وئرن انسانلارا اتحاف انديرم.

سانجى چكىر يئر كوره سى

~~~~~

يئددى يوز اؤتوز يول جيزدى دوواري  
 سربازلىق دورونو چاتدirdى باشا  
 باغلادى ساكىنى بير سحر چاغى  
 اوزونو يئتيرسين قوهوم قارداشا

ايكى ايل جان كيمين وطن تورپاغين  
 قوريوب دوشماندان غوربته دوزوب  
 سازاخدا، بوراندا، ظلمات گئجه ده  
 شيرين يوخوداندا آنجاق آل اوزوب

عزتله چاتدیریب بورجونو سونا  
 هجران دالدا قالیب وصال قاباخدا  
 سربازین گول اوزلو آداخلی سی دا  
 آریزلار بسله ییب تک بیر اوتاخدا

ماشین بوروق بوروق جیغیر یوللاری  
 اوتاراق یوللانیب مقصده ساری  
 سربازین خیالی ماشیندان قابق  
 چکیر اوز کامینا توزلو یوللاری

اؤزو ماشیندادیر آمما خیالی  
 آغ بیرچک آنایلان اولوب قول بویون  
 آتابیر طرفده قارداشلاریلان  
 ایاقی آلتیندا کسیدیریر قویون

دوستلار دسته دسته آلیب دوره سین  
 بوینوندان آسلانیب خیردا باجی سی  
 محبت جوشلانیر دورت بیر طرفدن  
 سربازین جانیندان چیخیر آجی سی

بو صحنه پوزولور ذهنينده بير آن  
 ايندى اوتاقدادير اداخلي سيلان  
 بودئير سن تاي سان عزيزيم گوله  
 اودئير وورغونام سن تك بولبوله  
 بودئير ايكى ايل گولمه ييب اوزوم  
 اودئير تيكيليب يوللارا گوزوم  
 بودئير ديقه لر ايل كئچيب منه  
 اودير تك ليكدن نه دئيم سنه  
 بودئير چوخ شادام قور تاريب كدر  
 اودئير ياواش د فلک انشيدر  
 آيريليق آجى سين دادان چوخدوسا  
 خيالآ آيريليق يوخدو دونيادا  
 نئجه كى بيستون داغيندان خيال  
 شيرينين آينى وئردى فرهادا

خیالین آل قولون باغلاماق اولماز  
خیال احساس یوکون دائم داشی یار  
خیال بیر طرلاندر قفسده قالماز  
خیال زنداندادا آزاد یاشی یار

خیال بیر رشام تک فیرچاسی الده  
هر زمان آرزی نین قاش گوزون به زر  
مجنونو ای ایاخدان سالسادا هجران  
خیالی لیلی لن یان با یان گزر

وورغون بونیتله یومار گوزونو  
گورسون یار اوزونو بلکه یوخودا  
خیال قیرقی کیمین جومار اوستونه  
قاچار گوزلریندن آنجاق یوخودا

ماشین یاخینلاشیر مقصده ساری  
گئجه آستا آستا یاری دان آشیر  
آی باتیب بولودا اولدوزلار یاتیب  
گوی دن یئر اوزونه قارانیلق داشیر

بـورويوب كـؤشنى ايتلرین سـسى  
 آنـجاق خـروسـلاردا واقـسـيز بانـلايـير  
 بـو يـئـركـوره سـينـين سـانـجـيلـانـماقـين  
 حـيـوانـلار انـسانـدان قـابـاق آنـلايـير

سـوروجـو آغـير بـير وحـشـته دـالـيب  
 فـلـك باشـلايـپـدير يـنى بـير اوـيـون  
 سـربـازـين قـايدـيب هـوشـى باشـينا  
 حـيرت يـوماق كـيمـين بـوره يـيب بـويـون

تـرپـنـير بـئـشـيك تـك يـئـرين كـوره سـى  
 مـين ذـلـلت دـوغـولـور بـو تـرپـنـيشـدن  
 آنـجاق كـى هـلهـده بـيلـن اولـمايـيب  
 فـلـكين غـرضـى نـديـر بـوايـشـدن

بـيرى سـى دـئـيـير كـى بـعضـاً بـنده سـين  
 سـيـناقـدان كـئـچـيرـدير بـير اولـان تـارى  
 بـاشـقـاسـى دـئـيـير كـى تـارى بـنده نـين  
 سـيـناق سـيزدا بـيلـير نـديـر چـيـخـارى

بیری خیال اندیر یارانمیشلاری  
 یئر اوزره تو توپدور مظلوملار آهی  
 بیری ده دئییر کی بو سوز دوز اولسا  
 سود آمر اوشاغین ندیر گوناھی

سئلین قاباقیندا سد وورماق گرهک  
 وریان گوج گلن مز بیر زامان سئله  
 آستا بیر یئلین اوچان داخمایا  
 بللی دیر نیلییر گلسه زلزله

کندین قیراغیندا دایانیب ماشین  
 یئر گوویو بوره ییب وای شوون سسی  
 بیر آغیر درامین سانکی باشلانیب  
 فلکین الی لن یئنی پرده سی

تیتره ییر تیتره ییر یئرین کوره سی  
 ینه ده تو خانیر یوخسولا داشلار  
 داخمالار گور اولور تالانمیشالارا  
 تورپاقدان گورور یارالی باشلار

دیـری قـویلا نیرلار انسانلار یـئره  
 گـبرلر قـبرینه داخـمالار دۇنـور  
 مینلرجه انسانین بیر شوم گـئجه ده  
 شام کیمین کۆزه رن چیراغی سونور

بالاواي، آناواي، آتاواي سـسی  
 یـئردن بوی آتارکن گویه یوکسه لر  
 گـئچلر قالپیدیر آوارلار آلتـدا  
 تورپاغی دیده لیر قانلی پنجه لر

گـئجه یاواش یاواش قارا ئور توگون  
 چکیر یـئر اوزوندن آچیلیر سحر  
 آنـجاق بـو سحرده خروس یـئـرینه  
 آتاسیز، آناسیز کؤرپه لر مـلـر

چوبانلار ابدی یوخویا گئتمیش  
 قویلا نیب تورپاغا قویون قوزولار  
 اولنلر دینجه لیب آما قالانین  
 گلیر پئشوا زینا غم قاطر قاطر

بولبولر سوسوپدور آما بايقوشلار  
 وئران داخمالارين استونو آليب  
 يازيق سربازيندا ائلدن، طایفادان  
 خیردا بیر باجی سی تکجه ساغ قالیب

ایکی گون سووشوب بو فاجعه دن  
 سربازین آغاریب غوصه دن باشی  
 خیرداجا قیزین داسولغون اوزونده  
 ایز سالیب گوزوندن آخان قان یاشی

بوتون آریلاری قویلائیپ یئره  
 گنجه نی گوندوزدن آوارمیر گوزو  
 هیکلین اینجلدیر هر زامان هر آن  
 بیر یانار شام کیمین آیریلیق کوزو

ایندی سه اوچوق بیر دووارین اوسته  
 خیردا بیر قیز دوروب بیر جاوان اوغلان  
 بو تکیب گوزلرین سون سوز اوفوقا  
 او قازیر تورپاقی بارماخلاریلان

اردبیل ۱۳۶۹/۴/۵

## حياتيمين بير گنجه گوندوزو

بۇلۇنوب دۇرد يئره گنجه گوندوزو

بۇلۇنوب دۇرد يئره گنجه گوندوزو  
 هر بير حصه سینه چالیشماق گرهک  
 نئيله مک آتالار یانديران اودا  
 زامان اۇتدوگوچن آلیشماق گرهک

اۇزوم بۇلمه ميشم بئله بولگونو  
 کیم دئييب، کیم یازيب بيله بيلميرم  
 بير قارا یازی دير چاتيب الیمه  
 آنجاق بير سطرینده سيله بيلميرم

چارمیخا چکیبدیر بولگولر منی  
 یاخام هر دور دونون الینده قالیب  
 چالیدیقا باشیما زامان چکیجین  
 غوصه لر الینده جثم خیردالیب

هـاـيـانـدـان قـاچـيرام اورا چـاـتـيرام  
 ال آياق چـالـيرام غـم چـالا سـينـدا  
 طـلـسمـه توشـموشـم خـسـته قوش کـيـمين  
 تـاـپـدانـميش وارليـقين داش قـالـاسـينـدا

سـيـنـديـرا بـيـلمـيرم بو داش حـاـصـاري  
 بـيـلـديـگـيم دوعـادا ائـردن توشوب  
 کـسـرلي سـيـلـا حـيم قـلم اولـسـادا  
 اودا چـوخ زامـانـدير کـسـردن توشوب

بـير دامـلا ايشـيـقا ظـلـمات گـئـجهـده  
 چـوخ اولوب دئـمـيشـم اوـمود کـؤـزودور  
 آـمـما ياخـيـنلا شـجـاق ايشـيـقاسـاري  
 گـؤـرموشـم کـؤـز رهن، قورـدون گـؤـزودور

سـئـودـيـگـيم حـيـاتـين بـعضـاً اولوب کـي  
 بـايـاض واراق اوـسـتـده شـکـلين چـکـمـيشـم  
 شـورـانـليـق تـورپـاخـدا بـعضـاً ده اولوب  
 آيـدين گـله جـگـين بـذرـين اکـمـيشـم

دورد يئره بۇلونوب گنجه گوندوزوم  
 بوگونوم دونه نين اكي ز تايي دير  
 دورد پايدان بير پايي اوزومون اولسا  
 نئيله مك اوچ پايي اوزگه پايي دير

آلتى ضربه ساعات وورور  
 آجى يوخوم چاتير باشا  
 ايكي ساعات دورماليام  
 سحر چاقى اون لاواشا

چۇره كچى نين قاش قاباغين  
 اوت مالىيام دۇننه دۇننه  
 واي اوگونوندىن نوبامنه  
 چاتان زامان تندر سونه

اوندا منيم چۇره كچى يه  
 تورشياچاق قاش قاباغيم  
 اوگون عومور سورمه گه ده  
 اولم يياچاق ديل داماغيم

چۆره كچى نىن دوست بازليغى  
 گـتـيرمەسە مـنى زارا  
 بـلكە اوگـون بـيـزىم ائـودە  
 چۆره ك اولاشام ناھارا

سكگىز ضربە وورور ساعات  
 دفتر نومرە اليـمدە دـير  
 طوطى كىمىن دونكى سۆز  
 گىنە مـنىم دـيـلىمدە دـير

گرامافون صفحەسى تـك  
 ضبط اولوبدور سۆزلر مـنە  
 يوزدن آرتىق ھەر كلاسدا  
 تىكىلىبدير گۆزلر مـنە

گوندە بئش يول ھەر صفحەيە  
 قـولاق وئـرم اؤزوم گرەك  
 تـوخانمايا بـير كىمىسەيە  
 دىلدىن آخان سوزوم گرەك

قارا تاختا آغ گچيمين  
يازى سيندان گليب زارا  
گاه اوزوننو آغارديرام  
گاه پوزورام اولور قارا

هي تکرار، هي تکرار، ينه ده تکرار  
اولمايا يئني ليک کوسوبدو مندن  
بولبولده بير عومور يازدا ياشاسا  
چيره ييب کوسه جک ياشيل چمندن

کورپه بير اوشاقددا دوداغين بوزور  
تکراری بير فيلمه تلویز یادا  
گونه آلتی ساعات دئيلمیش سوزلر  
چئیننمیش ساققیزی گتیریر یادا

هي ایلدير سووشور تازا ایل گلیر  
اوشاقلار بوی آتیر گنج ایگید اولور  
آداملار ده گشیلیر کلاسدا آنجاق  
هر ایل کی ییغینجاق گینه قورولور

ائله همان سۆز دور دئيلن سۆزلر  
 هر نه يين تازاسى سۆزون كهنه سى !  
 آنجاق معلّم دن انتظار بودور  
 چاليشسين اوشاقين چيخماسين سسى

اللى دن يوخارى اوشاق كلاسدا  
 اللى جور تربيت اللى جور باخيم  
 هر كسين آغزىندان بير آواز گلير  
 قالميشام آوارا هانكى نا باخيم

بيري نين آجىندان ساراليب رنگى  
 بيري نين توخلوقدان قيزيشيب انگى

بيري نين چيگننده خزدن پالتوئى  
 بيري نين اگننده بئزدن مانتوئى

بيري سى كورلوعون دادىنى بيلمير  
 بيري سى بوللوعون آدىنى بيلمير

بیرینین باشماقدان چیخیب بارماقی

بیرینین گول آچیپ بارماق دیرناق

بیری خوش گونوندن داستانلار دئییر

بیری غم غصه ایلن خلوت ائيله ییر

بیرینین پوزولمور گولوش اوزوندن

بیرینین اوخونور دردی گوزوندن

منده کی ایسته سم حورمت ساخلام

گرک همی گولم همده آغلام

ساعات بیری اعلان ائدیر

چوره ک پولون قازانمیشام

اوشاقلارلا ناهار یئیپ

بیر آرجا دا اوزانمیشام

آنجاق منیم گوزلریمین

یـاتماغیلان یـوخ آراسی

شــعر يــازماق اولوب مــنيم  
دۇرد بـۇلگـونون بـير پاراسى

شــعر مــنيم حـياتيمين  
ان ماراخلى پاراسى دير  
وارلىق مــنيم گوزوم اولسا  
شــعير گوزون قاراسى دير

شــعر مــندن آيـرى تـوشـه  
آيـر يـليقا دۇزمـمـه رـم  
مــن شــعيردن آيـرى تـوشـم  
سوز ايـنجى سـين دوزمـمـه رـم

شــعر مــنه قاناد وئـرير  
ماوى گويده شـهـر آچام  
شــعر مــنه آچار وئـرير  
حـاق قايى سـين اونلان آچام

شعر منیم هارا گئتسم  
 آن سئویملی سیرداشیمدیر  
 شعر منیم همی بالام  
 هم ایستکلی قارداشیمدیر

من شعرسبز بو دونیادا  
 یاشاماقدی خوشلامیرام  
 شعر منی بوشلاسادا  
 من شعرى بوشلامیرام

بیر عاشیقام سازیم توشمز الیمدن  
 زامان منیم واریوخومو آلسادا  
 آلابیلمز شعرى منیم دیلیمدن  
 فلک منی یامان گونه سالسادا

بیر بولبولم اؤزگولومه باغلی یام  
 سئلده گلسه آپارانماز سارامی  
 وورغون کیمین اؤز ائلیمه باغلی یام  
 یادلار الی باغلایانماز یارامی

شعر اولماسا بوغولارام سازاخدان  
 داغدان آلمان سال داشلارا اوخشارام  
 شعر اولاندا سسیم گلر اوزاخدان  
 بابکیمی قوچ نبی می اوخشارام

شعیریلن وارلیق گولور اوزومه  
 معنالانیر یاساباتان حیاتیم  
 شعیریلن دوشمان دیجک گوزومه  
 سینه سینین اوسته چاپیر قیر آتیم

اون ایککی نی ساعات وورور  
 من اویاغام هامی یاتیب  
 بیر گونومون آن ماراخلی  
 بولگوسوده سونا چاتیب

گنج قارا شعر پارا  
 یئر ایچینده اوزانمیشام  
 سحر چوره ک یوخ ناهارا  
 قویاق پولون قازانمیشام

گـۇز اۇنـونـده گـلـير بـيتـير

چـورـه كـچـى نـين قـاش قـابـاغـى

تـىز دئـيـرم اۇز اۇزومـه

كـاش يـوبـانا سـحر چـاغـى

بـوشـلايـيرام چـورـه ك صـفـين

مـحـصلـلر تـوشـور يـادـا

جـيرـيق بـاشـماق كـهنـه مـانـتـو

مـنـلن يـاشـير يـوخـوداـدا

دـاشـقا اوسـتـده پـاخـلاـساـتان

اـرـبـاـبـلارـين قـارـين آتـان

سـاـواـدسـيـزا پـيـتـيك يـازان

سـاـواـدليـيا قـبـير قـازان

قـان تـر اـيـچـره بـيـچـين بـيـچـن

كـوتـلـه لـرين قـانـين اـيـچـن

چوخ ايشله ييب شام سيز ياتان  
ايشله مييب گونه چاتان

بولبول اولوب لاپدان سوسان  
ايلمه ساليب آل قان قوسان

جبهه لرده قاناتا باتان  
شهرتلره شرف ساتان

عومومر بويو ناز گورميين  
قيشدا دؤنوب ياز گورميين

هامي ليغان رژه وئرير  
قاباتاغيندا گوزلريمين  
باغيشلايين چوخ چوخ اولدو  
اجي يلقى سوزلريمين

آلتى ضربه وورور ساعات  
آجى يوخوم چاتير باشا  
ايكى ساعات دورمالييام  
سحرچاغى اون لاواشا

اردبيل ۱۳۶۸/۹/۲۸



بىرىنن باشىنا سئوينچ، محبت  
ياغىر شىدىر غاما گويدن قاركىمين  
يازىق بىر كىمسەدە وئران داخمادا  
آنچاق سىزىلداير سىنىق تار كىمين

انسانلىق بازارى كاسادلاشىپ دىر  
ھەر كسە باخىسان اۋز ھايىندادىر  
زورلۇلار ھاقىنا دولاندىن سونرا  
گوزلرى زور سوزون يوخ پايىندادىر

گمى سى غرق اولان اداملار كىمين  
كوپوكدن دوتوروق نجاتدان اۋترى  
قارايلا آغ دىوك مصلحت اولسا  
رېشەسى باتلاقدا حياتدان اۋترى

بىز ھمان يولچى يوق وارلىقن يولون  
قويون تىك گئىدىرىك باشلار اشاقا  
انىشدن يوققوشدان انىب قالخىروق  
آنچاق كى سالىمشىق زورى اياقا

محبت یوکونو باغلاب گئدیب  
 اوره ک کورلمه دن دونوبدور داشا  
 ائله بئجرتمشیک کینه توخومون  
 قلنجین ایتیلدیر قارداش قارداشا

پاخیللیق آن بیوک صفت دیر بیزه  
 منلیکدن باشقاسین گورمور گوزوموز  
 بیر زامان یولداش دان چیخسایکی گوز  
 بیرگوز بیزدن چیخسا یوخدور سوزوموز

دورد اللی توتوشوق ائله دنیادان  
 چتین نفسمیزی عقلیمیز یخا  
 راضی بیک بازار ی اود توتوب یانا  
 آما بیزلر اوچون بیر دستمال چیخا

بئش وعده نمازی قیلاندان سونرا  
 دونیادا عقبایه نقشه چکیریک  
 قونشی دان خبرسیز آجدان خبرسیز  
 اوره کده جنتین طرحین توکوروک

بئش قیران دیلنچی اوجونا باسیب  
 وجدانی آسوده راحت یاتیروخ  
 بهشتین باهاسین بهانه بیلیب  
 سوئی قیمتینه آلیب ساتیروخ

یازیچی ایسته ییر حق سؤزون دئسین  
 یا ساغا باغلیدیر یا سولا برین  
 وقتینده کاسا یوخ آشدان ایستی راق  
 یئرینده بارداغوخ سودان داسرین

حالا شیرین اولار زنجفیل آجی  
 مسیحی تامسین سین یا جهود یئسین  
 کلامین زیئنتی دوزلوگونده دیر  
 مسلمان دانیش سین یا کافر دئسین

حقیقت گونش دیر مجاز دومانلیق  
 بیرر سین قورد سئور بیرینی انسان  
 شمشک دیر حقیقت چاخناشان زامان  
 سوکر قارانلیقین باغیرینی هر آن

حقیقت بیز لردن آیری دگیل بیل  
 آن بیوک حقیقت گوزده بلله نر  
 بیر زامان گئینسه مجاز پالتارین  
 توپوق ووران دیلده، سوزده بلله نر

حقیقت چیلپاقدیر پالتاری یوخدور  
 در دور بسله نیب صدفلر ایچره  
 گوزگی دن آیدین دیرگونشدن پارلاق  
 سایریشار اولدوز تک همدفلر ایچره

حقیقت آرزیدیر سینیق اوره کده  
 انسان ایستگی دیر حریت مارشی  
 حقیقت قیزیل دیر قاتقی دان اوزاق  
 نورون قایناقیدیر ظلماتا قارشی

حقیقت اوره کده دوستاق قالسادا  
 بیر زامان اهلینی دیللندیره جک  
 گونشین اوستونو دومان آلسادا  
 هاردادییر اوزونو بللندیره جک

اردبیل ۱۲/۱۰/۱۳۶۵

زلزله حادثه سینده قانا باتان ائللریمه

کیچیک بیر تحفه

## ساوالان قانا باتدی

~~~~~

فاجعه نین آغیرلیقی کلمه لره سیغیش مئییر،

نه دن یازیم، نجه یازیم

قارا قیشین قانلی الی قیناخلارین ایلشدریپ یاخامیزا،

یاز گیزلنیب، قارانقوشلار یولدا آزیپ، قارایئلر وعده

یئلین خفه لهرک، چارداق کی یوخ آلی قابر ائلریمین

اؤلرینی یخماقدادیر، یئر کوره سی سانجی چکیر، قورخو

دوغور، ائل روزی سین، اکیب، بیچیپ، بیتیرنلر، نجه

دئییم قویلا نیپلار، یئرین قارا تورباغینا دن یئرینه.

ساولانیم، دامننده بئجر تدیکین مرد ایگیدلر قانا باتیب،

جاوان، قوجا، اوشاق، بیوک، مین بیر قارقیش توپوره رک

بودنیانین قورقوسونا، یاشایشین داشین آتیپ.

آنا قالیب، بالاسی یوخ، بالا قالیب آناسی یوخ، باجی
 اوخشور قارداش بویون یانایانا، باغری اولوب شانا شانا،
 قارداش توتور باجی سینین سوراغینی آوار آلتدان،
 آتالارین قان تریلن دیکلدیگی داخمالاری بالالارین
 قبری اولوب، بئجرتدیگی گوللر سولوب .
 فاجعه‌نین آغیرلیقی کلمه‌لره سیغیش مئییر .
 ساوالانیم بو ایل سنین آته‌گینده بیتن گوللر ائلروون آل
 قانیلان بزه‌نه‌چک، لاله‌لرون گلینلرون یاناغیندان .
 قیزیل گولون کۆرپه‌لرین دوداغیندان
 قارچیچگین آنالارین آغ ساچیندان
 بولاخلارون باخیشلارین قان یاشیندان
 قرنفلون جوانلارین گوز قاشیندان پای آلا رکن بویانا جاق .
 ساوالانیم، بو ایل سنون قوناخلارون قوجاق قوجاق .
 بوقچا بوقچا انسانلارین عاطفه‌سین آته‌گینه توکه توکه
 باش ساغلیقی وئرسنه
 یئنی قوشما یئنی ماهنی عاصم کیمین دییر سنه .

اسفند آیی - ۱۳۷۵

خور باخاندا دینیمه، تورپاقیمه بیگانه لر
 قهرمانلار ائتموسن قربان جانان اردبیل
 سن مقدس یوردی سان شیخ صفی نین موطنی
 سن دیانت ملکونون جسمینده سن جان اردبیل
 اولسا مین جانیم بیرین حاشا وئرم بیگانه یه
 بیر جانیم وارسا اودا ایرانه قربان اردبیل
 سن تشیع مهدی، صاحب عصریلن هم عهدسن
 تکیه گاهوندور سنین مهدی دوران اردبیل
 حق وئرمیش صاحبان حقه حق مخلصلری
 پارلا سین سینه نده تا عنوان استان اردبیل
 کیم سنی آماله چاتدیرمیش وار اولسون اللری
 شامل اولسون حالینه الطاف یزدان اردبیل
 پای لنگاندور اگر وصفونده طبعیم توسنی
 نقص مندندیر تاپیلماز سنده نقصان اردبیل
 هم صداقت ملکونه صورت نما آئینه سن
 هم بلاغت باغینا خورشید رخشان اردبیل
 سن ایگیدلر یوردی سان وورغون کونوللر مسکنی
 خون غیرت دور او شریانونده کی قان اردبیل

یایدا مینلر میهمانین ذهنینن تصویری سن

بوته نسیاندا سان فصل زمستان اردبیل

جنت الاعلادی یازدا داغ داشون میهمانلارا

قار بوراندا بیر اوزون سن بیرده سبحان اردبیل

باغلانیپدیر قتل به قتل کونلوم پریشان زلفینه

عاصمه رضواندی سنلن اولسا نیران اردبیل

اورہ گیمین بندی بیوک اوغلو داورہ

آتاسیندان بیر هدیه


داور او غلومون توی گنجہ سی

ਭਗਤ ਨਾਨਕ ਭਗਤ ਨਾਨਕ ਭਗਤ ਨਾਨਕ

بو گئجه منله غمین یوخ قراری عشق اولسون
 بو گئجه تاپمیشام ایتگین بهاری عشق اولسون
 بو گئجه ائل لریمین محتشم ترانه لری
 ائدیپدی نیسگیلی بیزدن فراری عشق اولسون
 بو گئجه آیدا منیم همدیمدی، اولدوزدا
 یاشیل چمن گورورم شوره زاری عشق اولسون
 قیزیل سویوندا اوزور ذهنده جوشان غزلیم
 سهالیر منیم یادیما نازلی یاری عشق اولسون
 اوچ ارزیمین بیر ی ترک ایلوب اوره ک ائوینی
 بو گئجه دانلامیرام روزگاری عشق اولسون

وریبـدی داوریـلن نـرگس ال الـه بوـگنـجه
 قـووپـدولار قـاپـودان انتـظارـی عشق اولـسون
 حیات یولداشیمین گوزلری گولور بو گنجه
 اوتورمئیوب اوزونه غم غباری عشق اولسون
 بو گنجه جمله قلمداشلاریملا محشورم
 اوره کله لمس ائدیرم افتخاری عشق اولسون
 گولوش یاغیر بو گنجه غنچه تک دوداخلاردان
 بیزه نهار ائلئیر لیل تاری عشق اولسون
 آلیبـدی داغ کیمی دوستلار ائله آرایه منی
 که تامسینام بو گنجه اعتباری عشق اولسون
 دؤنوپدی گلشنه دورت بیر یانیم بهشت کیمین
 بو گنجه گوللریمین یوخدی خاری عشق اولسون
 نه غم الیم گوده دیر زرق و برق دنیادن
 سیزله هر کیم اولا چوخدی واری عشق اولسون
 وقاری عاصمه وئرمکده قصرلر نه چی دیر
 اوکی ائلیندن آلیپدیر وقاری عشق اولسون
 اردبیل ۱۳۷۱/۳/۲۹

نمونه مدرسه



آی کیشی بيلم نه اولوپدور سنه
 دردینی گیزلتمه بیان ائت منه
 صوبح چاغی شادو خرامانیدون
 آی نه گوزل سئوملی انسانیدون
 بال کیمی شیرینیدی هر بیر سؤزون
 بنده یه باخدیقجا گولوردی گؤزون
 هر سؤزه اولمیشدی جوابون جانا
 لبلرون اوخشوردی گل خندانا
 محسنه گاهی بویوروردون بالا
 حق گوروم چینووه خلعت سالا
 یاخچی اغارتدین آتائین صورتین
 حفظ ائله دین حورمتین حیثیتین
 قویمادین آرزیم اوخی دیسین داشا

نمره لرون عالی دی باشندان باشا
 هوشدا فراصتده چکیب سن منه
 سن منه فخر ائيله اوغول من سنه
 آی کیشی شاد ائتدی منی گولمگون
 مین دیلین قیزلاری دیندیرمگون
 صوبح بو ائو خانه احسانیدی
 حاتم طائی بیزه مهمانیدی
 گاه بیچیردون کت و دامن منه
 گاه تیکیردون تزه دون سوسنه
 عالمه یه تای تای آلیردون پفک
 مهدی یه یخدان دولوسی نوش مک
 صوبح چاغی آیری بیر انسانیدون
 جسمیمه جان دردیمه درمانیدون
 ایندی نه اولموش قیز اریب گوزلرون
 زهر هلاهل کیمی دور سؤزلرون
 قاش قاباغون عین بولود ساللانیب
 بالتا دییب قول بوداغین داللانیب

نور نومودوندان اوره گیم یاره دی
 صور صوفتون قابل کفاره دی
 چهره ون اولوب لب لبی نین پیشمیشی
 دیل دگول آغزوندا ایلان دیر کیشی
 گوزدن آخیتما بو قدر آب غورا
 بور نووی او خشاتما باری شیپورا
 اوت غضبین قورخور او شاخلار کیشی
 اوز وثریرم ایستمه آستار کیشی
 بسدیر آی آرواد منی چوخ دانلما
 وقته قالیر آغزینی یوم بانلما
 صور صوفتیم، نور نور مودوم هر نه دیر
 سن کیمی جیرانه برازنده دیر
 من دند یگون، سن بویور آیا نه سن
 الی یاشین وار هله ده کور په سن
 گور میوب عمر و مده او طی شالواریم
 آما دیلون اولچوده ارشین یاریم
 آرواد اودور غم گونی عمخوار اول

اوز ارینه یاخجی مددکار اول
 ساخلاسا آرواد اگر اؤز حورمتین
 ارده اونون فرض بیلر عزتین
 چوخدا زن سن آدین اولماز رشید
 هرزه سوزون مرزه جوابین ائشید
 دوزدی سحر شاد و خرامانیدیم
 سیز بیتن سئوملی انسانیدیم
 مدرسه ده دگدی قاپاز باشیمه
 قاتدی سویی ایستی اولان آشیمه
 قاش قاباغیم بيله اگر ساللانیب
 قول بوداغیم مدرسه ده داللانیب
 گتتمیشیدیم محسنی یازدیر ماقا
 بنده نی حالی ائله دی بیر آقا
 چون بو اوشاق نمره ده ممتازدی
 کان ادب صاحب اعجازدی
 اولگی اولوب جمله محصلره

مشتري ييک بيزده بوجور گوللره

هامي دان آرتيق بيز اوچون ارجي وار

آما بئش اون تاхта سيزه خر جي وار

تاختانه دير، خر نه دير آي آقا

لطف ائله بير ذره سوزي خير دالا

بنده ني عفوا ئيله بير آز ساده يم

توت اليمي فکر ائله افتاده يم

باخدي آي آرواد ائله بوز بوز منه

سانكي نوكر اربابا وورموش تنه

باشيمه قيشقيردي او صاحب سخن

بيله دندي تاختا اولار مين تومن

مدرسه ميز مردمی دور آي حاجي

چوپله پولی باخما منه قيقاجی

هر نه جيبيمده واريدي آلدیلار

طعنه لرین پيميريمه چالديلار

شرميله ذکر ائيليرم آرواد سنه

قيرمیزی خط چک کتیلان دامنه

درس او خیان چونکه چاتیر عزّته

گئت گوزلیم سنده یازیل نهضته

سوزلر ائشیتدیم او دبستانیده

مثلی اولانماز چالامیدانیده

محضرینه عرض ائدیرم الغرض


سوز چوخ اوزانسا اولاجاقدیر مرض

ایندی کی اولاد وطن پخته دی

مین تومنین بیر آدی دا تخته دی

اردبیل ۱۳۷۴/۵/۱۲

سہمیہ تو یوغی



بیرگون یولوم توشدو کاروان سرادان
گوردوم کی جماعت صفده دوروبلار
قیشین چیلله سینده سازاق هاوادا
کوپونلار الـلـرـده بویون بوروپلار

آیریلیب کیشی دن آروادین صفی
انتظار گوزلردی تیکیلیب یولا
گودرکن جماعت تو یوغ ماشینین
ساعات تک ایشله بیر گوزلر ساق سولا

آت آلماق خیالین آتیپ باشیمدان
نوبایا دورورام دورانلار کیمی
بیر الده کوپونوم بیر الده زنبیل
بوینومو بورورام بورانلار کیمین

دېقەلر سووشور ساعاتى آشير
 آجى باغير ساق تەك صفدە اوزانير
 ايسيتيرم توپوغون خير يندن كئچم
 قومار باز سياقى اياغيم يانير

ذهنيمده تۇرەنن خيال تيلان
 زامانين كئچمەگين احساس ائتميرم
 سرتيق ديلنچى تەك اوزوم چوخايب
 ايكى ساعات كئچير اوزدن گنتميرم

بىر زامان گورورم كاروانسرادا
 توپوخ اسكور تيلان ميدانا گلدى
 انتظار قوتاريپ غم چاتيب باشا
 سانكى يوسفيميز كنعانا گلدى

مەلەير توپوغلار قفسەلردە
 فشاردان ھەر بىرى قويونلار كيمين
 يولداشين يولداشدان خبرى يوخدور
 اوشاقلار اوينايان اوينلار كيمين

قفسدن تو یوخلار چیخاردیب باشین
 هاردادیر بدنلر خبر وئرن یوخ
 تو یوغلوق خصلتی تو یوغ یادیندان
 چیخیب ائششک کیمین آنقیریر تو یوغ

صفده کی گئت گئده نظم دن چیخیب
 هر کسین اوزی چوخ حاقی دا چوخ دور
 هله ده زور دئمک حکم ائدیر بیزه
 آغلامیانلارا پیه پیه یوخ دور

ساغ اولسون بو شهره سهمیه بؤلن
 عدالت گوستریب بولگی بؤلنده
 وارلی نی، یوخسولی بیر گوزده گوروب
 وجدانی راحت دیر گورا گئندنه

بیر نفر بیر تو یوغ بئش نفر ایضاً
 آلتی یا چیخاندا سهمی دو بل اولور
 یئددی دن اونا اجاق یک دوون ووروب
 اون بیره دولاندا شانسی دا دولور

قیسساسوز قفسلر قویولور یثره
بیر آرواد بیر کیشی تویوغون آلیر
تویوغ آزالدیقجا، آدام چوخالیر
ساییرام نوباما اون نفر قالیر

لاپدانان بیر نفر یولدان یئتیشیر
گورورم الینده حوالهسی وار
بیزلر مستأجریک او ائوییهسی
الینده قورقوشوم قبالهسی وار

باشلاییر تویوغی خیار تک سئچیر
یاخچی سین گوتورور پیسین بوشلاییر
قویون تک تویوغوات داش ائیله ییر
اودا اوجور بیلیر اوجور خوشلاییر

اودا اوز یوکونو چاتیب یوللاییر
ترک ائدیر بیزلری گولر اوزولن
گورورم جماعت سس سیز صداسیز
باخیر بیریرینه سوزلو گوزولن

تويوغون آخیری یئتیشیر منه
 بيلمیرم بو وضعه گولوم، آغلاییم
 آنجاق کی دئیورم اوزوم اوزومه
 گرکدیر الیمی اودلان داغلاییم

بس که حیوان قالب تويوغلار آلتدا
 دیلسیز حیوان ماتین قیراغیندادیر
 اوقدر زیل یاغیب اوستدن باشینا
 بدنده صاف یئری قولاغیندادیر

ماشین تويوغونون رنگی آغ اولار
 آما بونون رنگی قارایا چالیر
 گناه سیز حیوانین گناهی نه دیر
 انسانلار حیواندان انتقام آلیر

طبیعت تويوغدان خوخان جور لاییب
 آدمیلار الینه توشن شیر کیمین
 گوزلر مالالانیب پالچیق دووار تک
 آغزیندان سو آخیر کهنه شیر کیمین

یوخلانیر بیر کیلو یوزگرم گلیر
قول، قاناد، باش، ایاق اوستونده سوواخ
آبریلسا آت آشکال، خالص اتینی
وئرسم دیلنچی یه توکر قاش قاباخ

تویوغی زن بیلده استتار ائدیب
یولدا گله گله نقشه چکیرم
بیر آز آرپا آلیپ باققال ممی دن
تویوق کوکلمه گین طرحین توکورم


اٲوه یٲٲیشرکن طشتی دولدوروب
حیوانی ترتمیز یووندورورام
سانکی بیر کورپه نین محبتیلن
چیرکلی پالتارینی سویوندورورام

بیر آی بو حیوانا قوللوق ائدیرم
حیوان محبتین دادین آنلاییر
ذللندی گونلرین یاددان چیخاردیب
هر دمده بٲچه تک بیر یول بانلاییر

بىر گون آخشام چاغى انوه گلنده
 گورورم تويوخدان انوده يوخ اثر
 سورورام انامدان سنوله بير منه
 بانلايان تويوغدا چوخ اولار ضرر
 تويوغ كى بانلادی يومنى پيس اولار
 ايشلر بوتون دؤنر اؤز ترسه سينه
 بايقوش تك بوائوى وئران ائتمه ميش
 ياپشیرديم تويوغى اؤز ييه سينه

اردبیل ۱۳۶۴/۵/۱۲

نیلہ مگ ایش بیلہ گلیمیش



گزیرم شهرده مدتدی اویاندان بویانا
بو خیاليله که بختیم یو خوشوندان اویانا
قورخورام قیچلاریم آخریری مکدن دایانا
اتوبوسدان نه یازیم تاکسی یادا اولما اُمید
”دوستان شرح پریشانی من گوش کنید“

ظَنّ ائدر دیم که بیر آز چوخ اولا گر خط ماشینی
 تاکسی سلمان کیمین وور میاجاق خط باشینی
 الغرض آرتدی ماشین تاکسی نین آتدیم داشینی
 اتوبوسدا فشار آلتیندا سوا ولدو بدنیم
 "بیر حبابم که هوادن دولودور پیرهنیم"

هله لیک کوچه و بازاریده ویلان گزیرم
 من خیابانیده آهوی بیابان گزیرم
 عصر آهنده سوار اولماقا حیوان گزیرم
 ائله سرگشته و زارم که سیزیلدار بدنیم
 "ئولا زنبور ائوینه بنزه سه بیتالخرینم"

نیله مگ ایش بئله گلمیش که چوخ اولسون نیازیم
 سرنوشتیم بودو صفالرده اوزانسون بوغازیم
 من چوره کدن نه دئییم سیزلره آتدن نه یازیم
 بونا بیر توربا پول ایستر اونا قیچلاردا توان

”تا به خلوتگه خورشید رسی چرخ زنان“

دئدیم آهسته دونن صفده دوران مشتری یه
سن بیل آلاه نظر ائت طبخ اولو نان بربری یه
بونا بیر بُشکه سواستیر که آغیزدا اری یه
دئدی یا آغزینی یوم یا سوزونو سئوله یواش
”ای که در نعمت و نازی به جهان غره مباش“

جوابیندا دئدیم عفو ائت منی بیرآز ناشی یام
دیشلیگیم اولسادا مدّتدی که دیش سیز یاشییم
هضم اولونجاق بو چوره ک دام دوووارا دیرماشییم
گنجه گوندوز منیلن گر چه چیخیب جنگه چوره ک
”من نه آنم که زبونی برم از چرخ فلک“

برکت اولماقینا توتمورام اشکال داداشیم
آغاریب ساغا دیرمانیده اون مثلی باشیم

لاستیکه تک قاش آتیر بربری مثلی لواشیم
 دئمیرم شاطر و مسئؤل آرا واردیر زدوبند
 "قرعه فال بنام من دیوانه زدند"

وارد اولموشدی بیزیم منزله بیر تازه قوناق
 بیر تیکه بربری میل ائتدی یازیق اولدی عناق
 دئدی آهسته عم اوغلی بو چوره کدور یا پیچاق
 منیدیم رد ائله دیم بو چوره گی حنجره دن
 قاپی دان گلمیشیدی قاچدی چوله پنجره دن

قوناغیم ترک ائله دی منزلی افسرده و منگ
 بو چوره ک ائتدی اوچ آیلیق قوناغا عرصه نی تنگ
 آدینا سن ده چوره ک من ده دئییم حربه جنگ
 تا جماعت نه قضاوت ائده "عاصم" نه دییه
 دیشی یوخ انسانا تجویز ائدیرم شیرنی ییه

اردبیل ۱۳۷۶

جبرانی معجزه‌سی مدرسه لرده

~~~~~


گوردون ای دل نئجه مشکللرون آسان اولدی  
 مدرسه تنبل اوچون روضه رضوان اولدی  
 مُفت و مجانی اتاق مُفته معلّم لر یلن  
 لایبالی اوشاغین شأنینه شایان اولدی  
 اوقدر مدرسه ده بی سوادی نازلادیلار  
 هوشلی باشلی اوشاقا مدرسه زندان اولدی  
 آلتی آی خواب زمستانیه گئتدی بیر اوشاق  
 یازدادا راهی صحرا و گلستان اولدی  
 نه فیزیکدن خبری اولدی نه ده هندسه دن  
 شیمی نین آتدی داشین تاریخه مهمان اولدی  
 اختیاری بگنیب توتمادی جبرین آدینی  
 منطقه وئردی تپیک فلسفه بی جان اولدی

تکجه جغرافی ده بیر نکته نی قاندى بو اوشاق  
 بونا دائر که داهای اردبیل استان اولدی  
 چاتدی چون خرداد آیی آنجاق اونو رسته جوان  
 امتحان وئرمگه چوخ زار و پریشان اولدی  
 مغزی بوش اما تقلب کاغذی جیب دولوسی  
 پهلوانانه گلیب وارد میدان اولدی  
 سعدی نین شعرینی ثبت ائیلهدی حافظ آدینا  
 چاله نین معنی سی ده چاه زنخدان اولدی  
 بوعلی سینانی قدرتلی فیزیکدان ائله دی  
 او فیزیکدانیده توضیحده لقمان اولدی  
 بوذری صاحب زر ذکر ائله دی بینش ده  
 صدر اسلامده سلماندا سلیمان اولدی  
 نیوتن جاذبه سین ایسته دی اثبات ائله سین  
 آلمایثردن کوسهرک عازم کیهان اولدی  
 جبر بیر، شیمی یکی، هندسه اقلیدوسی اوچ  
 ائشیدیب بوسوزی لاوازیه گریان اولدی

الغرض امتحانین موسمی که چاتدی باشا  
 تنبلین نازی نی چکمک لیگه امکان اولدی  
 گلدی جوشه ائله مسئوللرین عاطفه سی  
 جاهلین مزمن اولان دردینه درمان اولدی  
 سالدیلار کورپی که خردادیله شهر یور آرا  
 افت تحصیل گوزل وجهیله جبران اولدی  
 دوققوز آی مدرسه ده اوخشادی نودان بوزونا  
 یاریم آی چکمه دی علامه دوران اولدی  
 قان تری توکدی معلم داشی نرم ائیلهمه گه  
 تنبلین مرحمتیندن اوره گی قان اولدی  
 باشداکی توکدی اوز انبانینه جبرانی پولون  
 دئومورم بنز ولی صاحب پیکان اولدی  
 گرچه تحصیلده شایسته دی عاصم حرکت  
 تکجه الله گوروم تنبله وئرسین برکت

اردبیل ۱۳۷۵/۶/۲۰

## آ تانين ديلي جه مشه جيران عيالينا



سنلنم آی مشه جیران قولاغ آس من سنه قربان

بیزاوچون قادر منان وئریب دیر بئله فرمان

که چاتان چاغدا بلوغ حدینه هم قیز همی اوغلان

آتانين هم آنانين پورجودو همت كمرين باغلا يارق

اونلاری سامانه یئتیرسین، بورجی پایانه یئتیرسین

نُجھ کی بندہ نین حقیندہ همان بورجی ادا ائیلہ دی

مرحوم سلیمانیلہ عصمت، تا سن اولدون منه قسمت

بٹلہ دیر حکم شریعت، بٹلہ پیر حکمیلہ انسان تا پیر

ارزش و قیمت، بشریت بئله بیر حکمه گرک باش آیه تاروز

قیامت تاکہ پیر فرق او لا محشر گونو انسانیلہ حیوان

آراسیندا، یوخسا انسان اؤزو حیوانیدی انسان لباسیندا.

اودور عرض ائتمه لی یم قوللوغونا بیزکی بو اوغلانه اوتوز

ایمل مایا قویدوق جانیمیزدان، صود ایچیرتدیک

قانی میزدان، ایشله دیک صبح و مساقان تر ایچینده، سن  
و من یایدا بیچینده، قیشدا من دامدا کوره ک آله قاریلان  
گولشنده، سنده اربابلارین ائولرده گئدیپ پالتارینین  
رنگین آغارتدین، آینا تک باغری قارالتدین، اوکی وار  
ذلته دوزدون، سن اوزوتنده آل اوزدون که بو اوغلان باری  
بو دهرده عزتله بوی آتسین، باشینی باشلارا قاتسین،  
یوخلایان بختی اویاتسین، معرفت صاحبی اولسون بارا  
دولسون، اوکی ایستردیک او اولسون. ایندی آز چوخ بئله  
بیر تکلیفه تعظیم ائده ره ک وقتی چاتیبدور که بو اوغلانا  
حلال بیر صود آمن قیز تاپاسان سیرتی عالی، اوتانان،  
دیل دئمه یین شرم و خیالی، آز چوخ قانع اولان، دردی  
قانان همده وفالی، ائله بیر قیز کی بیزیم اوغلانی سامانه  
یئتیرسین، جعفرین گیزلین اولان دردینی درمانه  
یئتیرسین.

مشه جیرانین جوابی :

آی کیشی بسدیر اوزاتدین سوزی قاندیم نه دئییرسن،  
منه آز سئوله شعیرسن، من اوزومده ائله چوخداندی

وارام قیز سوراغیندا یانیرام فیکر اوجاغیندا، گزمیشم  
 شهریمیزین کوچه لرین تنگه به تنگه، سنده تو وئر موسن  
 آنکه، چوخ گتیرمه منی تنگه، آی یازیق سن زامانین  
 قایدالاریندان نه بیلیرسن، نه دئییم سوزدی دئیورسن،  
 قورادان حالوا یئیورسن، هله ده عمرون آشیب اللی نی  
 کئچمیشده یاشیرسان، بلکه ده سازدی حالین بنده زاره  
 دولاشیرسان. هچ بیلیرسن که بوگون قیز آلانین جیبده  
 گرک میلیون اولسون، هانسی پولدان اولور اولسون،  
 جیبلر آنجاق دولی اولسون، ایسته مز دوز یولی اولسون،  
 ائل ایچینده قارا پولدان دیکلن شهرتی اولسون، آدی  
 اولسون، سانی اولسون، مین جوره امکانی اولسون، ثبت  
 اسنادیده اوغلان آدینا شش دای ائو اولسون، ماشین  
 اولسون، مین دنه سکه آزادی گرک قید اوْلا محضرده  
 کبینده، داها پول قالدی قدیمده، هله سن سیر ائله عهد  
 قجرین کهنه دبینده، کله قَت کله مه دئییین، کوهنه  
 بوداخمانی ساتسوندا چتین قورتاراسان زرگر و بزازین  
 الیندن، گلینین دسته گولوندن، تالارین شام پولی

سیندان، عطارین بریزگیندن، آینا شامدان داراغیندان نه  
 بیلیم یاریراقیندان، اوغلانین توی گنجه سی بئی  
 لباسیندان، عاشیقین سازلا قیز اوغلان بویونو  
 اوخشاماسیندان، جیبوون یوخلاماسیندان، نچه ساعت  
 ویدئو فیلمی گرک توی گنجه سین تصویره چکسین، پول  
 آلیب خاطره اکسین، نه دئییم بنده تخدم، چوخونون دیل  
 یاراسیندان، سوز آچیم من هاراسیندان و نچه یوز بئله  
 مشکل که دئسم توسدو قوپارداندی باشوندان.


یوخ سؤزوم جعفریمیز یاخچی جاواندی، ادب و معرفتی  
 ورد زباندی، آلیشانندی، چالیشانندی، گنج کوسوب تئز  
 باریشانندی، هم گوزل رتبه سی هم الده گوزل مدرکی  
 واردی اؤزی بیر پارچا چیخاردی، آما یوز مین دؤنه  
 افسوس بو تحصیل و کمالات، آچا بیر مشکلی هیهات،  
 هله سن باشینی اوینات، کیشی قورتار من اولوم اوغلانی  
 قوی اؤز حالینا، عومرونو سورسون، بئله بیر رسمه  
 توپورسون که بو ایامیده مین عیب اول پول اولسا هنردی،  
 آما مین بیر هنرین صاحبی پول اولماسا محکوم


شهردی، مایه خوف و خطر دی، سوژی شهید اولسا  
 زهردی، یوخسولون جعفری باش قوزا سادا عرشه  
 جفردی، فعله نین ائوده محمدی آدی چولده ممیش دی،  
 ایشچی نین اولسادا عبدالله آدی دیلده آبیشدی، چوخ  
 کاسیب اولسا آبیش دی، ایمنی دیر عمرانین آدی، نجه کی  
 حاتم حتم دی گولونون کافدا اولان سرکشی گمدی، قودی  
 دور قدرتین آدی، زیلی دیر بوردا زلیخا نجه یوسفده  
 یوسوب دور، چوخ فلاکتده اگر سورسه عومور اوندا  
 اوسوب دور، وارلی نین آممامنوچهری منوش دور، مری  
 دور مریم اگر قویسا قدم لندنه بیرگون، لی لی دور لیلای  
 اولسا، سولی دور محفل اعیان آرا آد اولسا سلیمان،  
 سولی دور آما بیزیم کوچه ده کی چرچی سلیمان .  
 (کیشی نین دیلیجه)

بسدی آرواد چوخ اوزاتما، قوی یاتان یاتسین اویاتما، منی  
 چوخ دانلما آرواد، من نولوم واکتی ایتیرمیش بنجه تک  
 بانلما آرواد، گنجه کئچمیش یاریدان دنگه سر اولدوم داها  
 بسدی، باشا توشدوم هاوا پسدی، سوزلریم تکجه

هوسدی، قوجا اولسام دا بوتون آرزیلاریم دیلده  
 جاوان دی، قوش کیمین دور دیلگیم حیف اول دَبلر  
 چالاغاندی، ساکت اول جعفر اویانندی، ساکت اول جعفر  
 اویانندی

اردبیل ۱۳۷۵/۸/۲۹





سیندیردی سکوتی گورلله نین سسی  
قالدی قاطاریندان آرالی دورنا  
او وچو تنگینی سالدی حیینه  
یشرده قاناد سردی یارالی دورنا  
قالدی قاطاریندان آرالی دورنا

انتشارات آذرکهن

تهران : میدان سیاه    خیابان سیاه    خیابان زینا    کد ۷۵۹۵۲۷

قیمت : ۶۰۰ تومان